

摘藻堂四庫全書薈要

史部

欽定四庫全書薈要

史部

御批續資治通鑑綱目卷十七

詳校官編修臣汪鏞

欽定四庫全書蒼要卷七千四百二

史部

御批續資治通鑑綱目卷十七

起庚戌宋光宗紹熙元年  
凡十八年  
盡丁卯宋寧宗開禧三年

光宗皇帝紹熙元年

金章宗璟  
明昌元年

春正月朔帝朝壽皇



華宮○二月殿中侍御史劉光祖乞禁譏議道學

者

光祖入對言近世是非不明則邪正互攻公論不立  
則私情交起此固道之消長時之否泰而實為國家  
禍福祉稷之存亡甚可畏也本朝士大夫學術最為  
近古初非有強國之術而國勢尊安根本深厚咸平

景德之間道臻皇極治保太和至於慶厯嘉祐咸矣不幸而壞於豐熙之邪說踈棄正士招徠小人幸而元祐君子起而救之末流大分事故反覆紹聖元符之際羣兇得志絕滅綱常其論既勝其勢既成崇觀而下尚復何言臣始至時聞有讖貶道學之說而實未覩朋黨之分逮臣復來則朋黨已成而忠諫者獲罪矣夫以忠諫為罪其去紹聖幾何陛下即位之初凡所進退率用人言初無好惡之私豈以黨偏為主而一歲之內逐者紛紛往往納忠之言謂為沽名之舉至於潔身以退亦曰情懟而然欲激怒於至尊必加之以謗訕臣欲熄將來之禍故不憚反覆以陳伏期聖心豁然永為皇極之主使是非由此而定邪正由此而別公論由此而明私意由此而熄道學之譏由此而消明黨之迹由此而滅和平之福由此而集國家之事由此而理則生靈之幸社稷之福也不然相激相勝展轉反覆為禍無窮臣實未知稅駕之所帝下

其章讀者至於流涕何澹見之數日恍惚無措是年  
廷試舉人婺州進士王介策亦言今之所謂道學者  
即世之君子正士也君子正士之名不可逐故設為  
此名一網去之聖明在上而天下以道學為諱將何  
以立國哉帝嘉歎擢為第  
三由是道學之譏少沮

發明

君子以義理為勇以道德為威當勇而勇則  
雖鈇鉞有所不能移當威而威則雖鼎鑊有

所不能屈自王淮倡禁道學之名陳賈乞禁道學  
之說正心誠意之道為世大禁修齊治平之理當  
時不道何異洪水禽獸之害乎三四年間無敢言  
者先祖憤然上疏忌誠激烈讀之凜凜猶有生氣  
斯道將晦而復明正義既絕而復續苟非以義理  
為勇以道德為威者曷克臻此語曰見義不為無  
勇也君子宜肯負無勇之  
名哉直書于冊深予之也

廣義

嗚呼道學之在人猶日星之在天也人非道學則三綱淪九法斁幾於禽獸非人也天非

日星則晷刻亡五行滅均於杳冥非天也是知人不可無道學猶天之不可無日星也亘古迄今何嘗有熄間有誣妄試毀之者譬諸陰霾毒霧蔽於頃刻一遇飄風則掃滅殆盡曾何損于日星之明哉故四凶不能蔽之于唐虞防風不能蔽之于有夏藍夷不能蔽于高管蔡不能蔽于周春秋之君自蔽而孔子明之戰國之君自蔽而孟子明之漢自蔽而明之者董仲舒也唐自蔽而明之者韓退之也迨夫有宋朱子遠宗孔孟近迷周程闡明道學如日中天如星正度何其正耶夫何王淮陳賈林采葦以狗鼠之見大擁陰霾劇施毒霧而蔽之乎未幾卒遇先祖飄風之一掃不能損于日星之明而人心為之一快也噫道學與天地相為悠久者也日星之亡道學斯滅然則詆誣道學者身豈

久於日星哉借曰能久亦無以踰於日星也子貢曰仲尼日月也無得如踰焉臣敢以為文公頌

夏四月以伯圭嗣秀王

伯圭壽皇母兄而秀王子偁之長子也詔即湖州秀園立廟奉神主建祠臨安府以藏神御如濮王故事而以伯圭嗣王伯圭謙謹不以近屬自居每入見帝行家人禮宴私隆洽伯圭執臣禮愈恭

秋七月以留正為左丞相王藺為樞密使葛邲參知政事胡晉臣簽書樞密院事○冬十二月王藺罷以葛邲知樞密院事胡晉臣參知政事

亥二年金明昌二年冬十一月帝有事于太廟后殺貴妃黃氏

翌日郊大風雨不卒事而還帝有疾

初帝欲誅宦者近習慣遂謀離間三宮帝疑之不能自解會帝得心疾壽皇購得良藥欲因帝至宮授之宦者遂訴于皇后曰太上合藥一大丸俟宮車過即投藥萬一不虞柰宗社何后覘藥實有心銜之頃之內宴后請立嘉王擴為太子壽皇不許后曰妾六禮所聘嘉王妾親生也何為不可壽皇太怒后退持嘉王泣訴于帝謂壽皇有廢立意帝惑之遂不朝壽皇一日帝浣手宮中覩宮人手白悅之他日后遣人送食合于帝啓之則宮人兩手也后又以黃貴妃有寵因帝祭太廟宿齋宮后殺貴妃以暴卒聞翌日合祭天地風雨大作黃壇燭盡滅不能成禮而罷帝既聞貴妃卒又值此變震懼增疾不視朝政事多決于后后益驕恣壽皇聞帝疾亟往南內視之且責后后怨愈深



發明

易曰坤道其順乎承天而時行此言地道順承天施而無所作為猶婦道無違夫子而罔

敢專成也故又曰無攸遂在中饋夫李后之狡悍妬忌兇暴專輒積之有素由光宗溺愛衽席狎思恃愛不能禁之於其始而乃受虐於其終唐高宗之於武氏中宗之於韋氏用此道也嗚呼風雨之驟迅天地之震怒也黃壇之燭滅祖宗之謹告也光宗值此大變罹此大憾近在宮庭弗克詰責震懼增疾不視朝政何其愚哉人主視此則家齊而后國治國治而後天下平矣此固綱目經世之大訓也

廣義

李后殘虐天道應之如影響孰謂天人之相遠哉大書于冊為鑒昭矣

壬子三年

金明昌三年

春三月帝疾瘳羣臣請朝重華宮不果行

人君以孝治天下則臣下觀感以作忠兆民親

睦而成俗真所謂至德要道也  
宋光宗不朝重華宮葺羣彝倫  
災此為甚至於  
也強一朝詔人  
為之大悅則其  
為度懷德久為  
舉國之所共憂  
也

帝自有疾重華溫清之禮以及誕辰節序屢以壽皇傳旨而免既而帝神思寢清宰輔百官下至韋布之士以過宮為請者甚衆至有叩頭引裾號泣而諫者帝聞悟有籛然夙駕之意既而不果行都人始以為憂

**發明**

書不果行譏不決也曲禮曰凡為人之禮冬溫而夏清昏定而晨省文王之為世子朝

於王季日三鷄初鳴而衣服至寢門外問內豎曰今日安否何如內豎曰安文王乃喜及日中又至亦如之及暮又至亦如之光宗惑妬婦之讒言乖父子之天性有疾不朝不得已也疾瘳不朝果何執乎由是內外羣臣合詞勸請既然開悟復為不行嗚呼光宗於私恩全之為有餘於公義聽之為不足何以模範天下哉故上書

疾瘳下書不果行深罪之也

**廣義**

尚書曰立愛惟親孔子曰立愛自親始教民睦也况光宗乃父之事厥祖而克盡其道而

光宗目覩其盛者也今光宗之於乃父反以不孝  
答之綱目書曰不從者則其大逆無道之實昭揭  
萬世其惡可勝言哉嗚呼黃屋中居一不  
孝之子則國之根本斬矣欲綿國祚得乎

## 夏四月以丘寔為四川制置使

初留正帥蜀慮吳氏世將謀去之不果至是議更蜀  
帥正言西蜀三將惟吳氏世襲兵柄號為吳家軍不  
知有朝廷遂以戶部侍郎丘寔往寔陛辭奏曰臣入  
蜀後吳挺脫至死亡兵權不可復付其子臣請得以  
便宜撫定  
諸軍許之

## 六月以陳騏同知樞密院事

騏疏三十條如宮闈之分不嚴則權柄移內謁之漸  
不杜則明斷息謀臺諫于當路則私黨植咨將帥于

近習則賄賂行不求讜論則過失彰不謹舊章則取舍錯宴飲不時則精神昏賜予不節則財用竭皆切于時病

冬十一月日南至越六日帝始朝重華宮

十一月丙戌日南至丞相留正率百官詣重華宮稱慶兵部尚書羅點給事中尤袤中書舍人黃裳御史黃度尚書左選郎官葉適等上疏請帝朝重華宮不從吏部尚書趙汝愚入對往復規諫帝意乃悟汝愚又屬嗣秀王伯圭調護於是兩宮之情始通辛卯帝朝重華宮皇后繼至從容竟日而還都人大悅

后歸謁家廟

推思使臣鄧從訓

等一百八十八人

發明 春秋莊二年書夫人姜氏會齊侯于榘傳曰  
婦人無外事送迎不出門見兄弟不踰閭在

家從父既嫁從夫夫死從子今后歸謁家廟是光  
宗不能防閑其妻失夫道也李氏之惡著矣所以  
病帝也曰夫可以制妻乎適人從夫通乎其下况  
於天子天子者神人之主風教之本也不能正家  
如正國何若光宗者事父母以孝待妻子以嚴威  
刑以督下車馬僕從莫不俟命皇后從往乎皇后  
之往也則帝威命之  
不行嚴厲之不至爾

## 是歲諸路大水

發明 紹熙之治當時無足稱者然亦僅能擁虛位  
而已抑不知光宗惑姑后之言逆父子之德  
此小人之所喜而君子之所不取者况其大節既  
虧小何足數故凡逆氣乘之災異屢見故去年十

一月書大風雨而又諸路大水迭出于冊用見天  
人之變交應於時不可誣者踰二年壽皇憤崩稱  
疾不視而天位亦移矣然則餘慶餘殃之  
報夫豈僭差而或者以為賢君目之過矣

癸丑  
四年

金明昌

春三月以葛邲為右丞相陳騫參知政事

胡晉臣知樞密院事趙汝愚同知院事

御史汪義端與汝愚有隙上言高宗聖訓不用宗室  
為宰執汝愚楚王元佐七世孫不宜用之汝愚亦力  
辭不許命當制學士申論上  
意而黜義端汝愚乃拜命

金以胥持國參知政事

金初設經童科持國以經童入仕為太子祇應司令  
金主在東宮識之及即位遂大用持國為人柔佞有

智術時李妃得幸持國知金主好色陰以秘術干之  
又多遺賂左右妃亦自嫌門地寒薄欲藉外廷為重  
乃數稱舉持國由是金主信任之持國與妃表裏擅  
政士之好利躁進者爭趨其門四方為之語曰經童  
作相監婢為妃惡其卑賤庸鄙也翰林應奉文字趙  
秉文上書論之金主召問秉文言頗差異命之大興  
府事內族膏鞠之秉文遂引同議者修撰王庭筠等  
五人皆下獄被斥然秉文詩文精絕與楊雲翼齊名  
時號為楊趙後為翰林學士而卒雲翼忠厚善屬文  
仕至禮部尚書庭筠博學和易尤工文且善字畫名  
重於時

## 夏五月賜禮部進士陳亮及第

亮才氣超邁喜談兵議論風生下筆數千言立就所  
交皆一時豪俊志存經濟隆興初上中興五論不報

退居婺之永康益力學著書嘗圍視錢塘喟然歎曰  
城可灌也蓋以地下於西湖耳淳熙中更名同詣闕  
上書極言時事因言錢塘非駐蹕之所壽皇赫然震  
動欲榜朝堂以厲羣臣用种放故事召令上殿將擢  
用之曾覲聞而欲見焉亮耻之踰垣而逃覲不悅大  
臣亦惡其言切直交沮之待命十日再詣闕上書壽  
皇欲官亮亮聞而笑曰吾欲為社稷開數百年之基  
寧用以博一官乎即渡江歸厲志覲書所學益博其  
學自孟子後惟推王通嘗曰研窮義理之精微辨析  
古今之同異原心於眇忽較禮於分寸以積累為上  
以涵養為正脾胃益背則於諸儒誠有愧焉至於堂  
堂之陣正正之旗風雨雲雷交發而並至龍蛇虎豹  
變見而出沒推倒一世之智勇開拓萬古之心胷自  
謂差有一日之長蓋指朱熹呂祖謙也至是策進士  
問以禮樂刑政之要亮以君道師道對且曰臣竊嘆  
陛下於壽皇蒞政一十有八年之間寧有一政一事



之不在聖懷而問安視寢之餘所以察辭而觀色因  
此而得彼者其端甚衆亦既得其機要而見諸施行  
矣豈徒一月四朝為京邑之美觀也哉帝得其策大  
喜以為善處父子之間御筆擢為第一授簽書建康  
府判官廡公事  
未上一夕卒

發明

觀亮之宏才博學而不為時論所容則其在  
廷之臣罔非持祿保位因循苟且之人可知

矣迨夫光宗擢用亮乃告終可勝惜哉使其弗  
獲是顯則將沒齒無聞矣書之實所以哀之也

廣義

人才如亮者固不多得惜其氣質少純  
耳易曰謙謙君子用涉大用斯無弊矣

利州安撫使吳挺卒丘寔使總領財賦楊輔等權總其

軍

寔命總領財賦楊輔權安撫使統制官李世廣權總其軍以殺吳氏之權朝廷尋以興州都統制張詔代

召浙東副總管姜特立還留正乞罷相不許六月正出

### 城待罪

帝念特立不已召之留正引唐憲宗召吐突承璀事乞罷不報乃待罪六和塔而上疏切諫於是著作郎沈有開著作佐郎李唐卿秘書郎范黼彭龜年校書郎王爽正字蔡幼學顏棧吳獵項安世等上疏乞寢特立召命不報正因繳進前後錫賚及告勅乞歸田里亦不許

### 發明

溺愛社席狎昵羣小此固人君縱欲之私情特立陰邪小人前既擯斥於外此復召之使

還光宗躬自禁之躬自臨之則其縱欲之心駁駁  
乎已不可遏雖宰相之力諫羣臣之協詞皆不之  
恤若是手為惡則易而為善則難也既而留正忿  
然出城待罪而光宗畧無沮抑留連之意則君子  
小人之用舍從可知矣天下何由而平  
治哉直書于冊不再貶而其義自見

廣義

抑觀姜特立者初非有翊戴之功惟以潛邸  
舊臣而已光宗何至執一己之偏而違衆論  
之公哉書曰留正待罪于城外則  
有以見留正望君改過之心也

## 胡晉臣卒

帝自有疾不視朝晉臣與留正同心輔政中外帖然  
其所奏陳以溫清定省為先次及親君子遠小人抑  
撓倖消朋黨啓沃剴切

彌縫縝密人無知者

秋七月以趙汝愚知樞密院事余端禮同知院事○八月金主釋奠孔子廟

北面  
再拜

九月羣臣請帝朝重華宮不聽冬十一月始朝

帝制于后久不朝重華宮會九月重明節羣臣連章請帝過宮不聽而召內侍陳源為押班中書舍人陳傳良不草詞且上疏力諫給事中謝深甫言父子至親天理昭然太上之愛陛下亦猶陛下之愛嘉王太上春秋高千秋萬歲後陛下何以見天下帝感悟趣命駕往朝百官班立以俟帝出至御屏后挽留帝入曰天寒官家且飲酒百僚侍衛相顧莫敢言傳良趣進引帝裾請毋入因至屏後后叱曰此何地秀才欲

斫頭邪傳良痛哭于庭后使人問曰此何理也傳良曰子諫父不聽則號泣而隨之后益怒遂傳旨罷還內傳良下殿徑行詔改秘閣修撰不受於是著作郎沈有開秘書郎彭龜年禮部侍郎倪思國子錄王介等皆上疏請朝不從十月工部尚書趙彥逾等上書重華宮乞會慶節勿降旨免朝壽皇曰朕自秋涼以來思與皇帝相見卿等奏疏已令進御前矣及會慶節帝復稱疾不朝丞相以下皆上疏自劾乞罷黜嘉王府翊善黃裳請誅內侍楊舜卿彭龜年請逐陳源以謝天下大學生汪安仁等二百一十八人上書請朝重華宮皆不報十一月彥逾復力諫帝始往朝尚書左選郎官葉適奏自今宜於過宮之日令宰執侍從先詣起居異時兩宮聖意有難言者自可因此傳致則責任有歸不可復使近習小人增損語言以生

疑惑  
不報

發明

虞舜父頑母嚚嘗欲害舜而舜克諧以孝罔敢怠遑書曰祇載見瞽瞍夔夔齋栗瞽瞍亦

允若夫天子所為下觀而化也光宗之父非瞽瞍蔑視之心如塗人豈不為虞舜之罪人乎光宗制於妬婦無如之何三綱絕矣近在宮庭而曖昧若此則天下之大庶務之繁烏能徧理之哉故書羣臣請朝重華所以予臣之勉君於善書不聽所以責帝之不能從善書始朝所以譏帝之不誠於善綱目之美蓋亦循名責實焉耳

廣義

抑考去年十一月羣臣請朝壽皇不從因趙汝愚極諫從之至是羣臣又請朝而又不聽

至十一月因趙彥逾力諫而始朝也嗚呼光之於孝宗父子不相見者十月矣一制虐后而不能行已志則父不得為臣綱父不得為子綱夫不得為妻綱矣三綱既絕尚可以名人國哉伯夷不立于

惡人之朝  
以此類耳

召留正赴都堂視事復命姜特立還浙東

正出城待罪凡百四十日帝  
遣左司徐誼喻旨乃復入

十二月夏主仁孝卒子純佑立

仁孝在位五十五年始建學校于國中  
立小學于禁中親為訓導尊孔子為文宣帝  
然權臣擅國兵政衰弱于純佑立改元天

慶號仁孝曰仁宗

以朱熹知潭州

使者自金還言金人問  
朱先生安在故有是命

廣義

賢人君子之於人國也豈小補哉惟其不用故其國卒無善治焉今也光宗於文公反不

知之而金主則知之則其君之賢否蓋可見矣中庸曰聲名洋溢乎中國施及蠻貊其文公之謂乎

甲寅五年

金明昌五年

春正月壽皇有疾○葛邲罷

邲為相專守祖宗法度薦進人才博采古論惟恐其人聞之嘗曰十二時中莫欺自己其實踐如此

金購求遺書

發明

購求遺書帝王盛事而獨讓於金人為之中國視此當如何哉故前書釋奠孔子此書購

求遺書皆所以不沒其善也

夏四月帝及后幸玉津園羣臣請帝問疾重華宮不



從

自壽皇不豫羣臣請帝省視皆不報而與皇后幸玉津園兵部尚書羅點請先過重華且曰陛下為壽皇子四十餘年無一間言止緣初郊違豫壽皇嘗至南內督過左右之人自此譏間遂生憂疑以臣觀之壽皇與天下相忘久矣今大臣同心輔政百執事奉法循理宗室戚里三軍百姓皆無貳志設有間離誅之不疑乃若深居不出久虧子道衆口謗讟禍患將作不可以不慮帝曰卿等可為朕調護之侍讀黃裳對曰父子之親何俟調護點曰陛下一出即當釋然帝猶未許點乃率講官言之帝曰朕心未嘗不思壽皇點曰陛下久闕定省雖有此心何以自白起居舍人彭龜年連三疏請對不報屬帝視朝龜年不離班位伏地叩額血流漬鬢帝曰素知卿忠直欲何言龜年奏今日無大于過宮余端禮因曰叩額龍墀曲致忠

金史卷之二十七  
卷二十七  
懇臣子至此豈得已邪帝曰知之然猶不往壽皇疾益甚羣臣上疏請者相繼帝將以癸丑日朝至期丞相以下入宮門俟日昃帝復辭以疾於是羣臣請斥罷者百餘人詔不許裳與秘書少監孫逢吉等再上疏以請起居郎兼中書舍人陳傅良請以親王執政一人充重華宮使臺諫交章劾內侍陳源楊舜卿林億年離間之罪請逐之

發明

是時壽皇邁疾已踰三月此正光宗憂心惛悁不遑自逸之秋也故曰父母有疾不解帶

湯藥必親嘗光宗為天下之共主司天下之綱常父無疾而不能省父有疾而不能視反携所愛共相遊樂縱耳目之欲忘天性之恩其罪可勝言乎迨夫羣臣懇請問疾光宗愾諫弗從苟有人心者必於焉而變矣帝之舉措如此則是帝王而不孝烏可與論人道哉詩云永言孝思孝思惟則光宗

其愧之焉。綱目書此所以著其  
縱欲忘親溺情悖理之失耳。

### 五月壽皇疾大漸詔嘉王擴問疾重華宮

陳傳良以帝不往重華宮乃繳上告勅出城大罪丞  
相留正等率宰執進諫帝拂衣起正引帝裾泣諫羅  
點進曰壽皇疾勢已危不及今一見後悔何及羣臣  
隨帝入至福寧殿內侍闔門慟哭而出越二日正等  
又請對帝令知閣門事韓侂胄傳旨云宰執並出正  
等俱出浙江亭待罪壽皇聞之憂甚侂胄奏曰昨傳  
旨令宰執出殿門今乃出都門請自往宣押入城於  
是正汝愚等復還第明日帝召羅點入對點言前日  
迫切獻忠舉措失禮陛下赦而不誅然引裾亦故事  
也帝曰引裾可也何得輒入宮禁乎點引辛毘事以  
謝且言壽皇止有一子既付神器惟恐見之不速耳  
從官及彭龜年黃裳沈有開奏乞令嘉王詣重華宮

問疾許之王至宮  
壽皇為之感動

發明

夫漸者增劇之詞曲禮曰父母有疾冠者不

櫛行不翔言不惰琴瑟不御食肉不至變味  
飲酒不至變貌笑不至矧恐不至詈疾止復故光  
宗之於壽皇生不能事疾不能藥至於大漸猶不  
能往羣臣力請皆不能從其罪甚矣迨至請之不  
已始命嘉王代行嗚呼上行下效捷於影響光宗  
乃壽皇之子而嘉王亦光宗之子光宗不孝於父  
而欲嘉王之孝於己其可及乎凡直書其事而貶  
自見者此類是矣

六月壽皇崩帝稱疾不出留正等請壽聖皇太后代行

喪禮

壽皇崩年六十八是夕重華宮內侍計于宰執私第  
趙汝愚恐帝疑惑不出視朝持其劄不上次日帝視  
朝汝愚以聞因請詣重華宮成禮帝許之至日昃不  
出宰相乃率百官詣重華宮發喪將成服留正與汝  
愚議介少傅吳玕請壽聖太后垂簾暫主喪事太后  
不許正等附奏云臣等連日造南內請對不獲累上  
疏不得報今當率百官恭請若皇帝不出百官相與  
慟哭於宮門恐人情騷動為社稷憂乞太后降旨以  
皇帝有疾薨就宮中成服然喪不可以無主祝文稱  
孝子嗣皇帝宰臣不敢代行太后壽皇之母也請設  
行祭禮太后許之史臣曰高宗以公天下之心擇太  
祖之後而立之乃得孝宗之賢聰明英毅卓然為南  
渡諸帝稱即位之初銳志恢復重違高宗之命不輕  
出師又值全國平治無釁可乘然易表為書改臣稱  
姪減去歲幣以定鄰好金人易宋之心至是亦寔異  
於前日故世宗每戒羣臣積錢穀謹邊備蓋忌帝之

將有為也天厭兵革欲休生民故帝用兵之志弗遂而終自古人君起自藩入繼大統而能盡宮庭之孝未有若帝者終喪三年又能却羣臣之請而力行之廟號孝宗其無愧乎

發明

孟子曰養生不足以當大事惟送死可以當事光宗於天性之恩乖戾已極生不能養疾

不能侍死不能葬是誠天地間之罪人也蓋稱者不宜稱也無疾而偽稱之者也當五內分裂之時正哀痛迫切之日安有父亡而子可稱疾不出者乎然親喪固所自盡也豈太后所能代而行之哉光宗誠可謂滅絕天理者矣故直書以著其惡

廣義

前書夏四月帝及后幸玉津園羣臣請帝問疾重華宮不從繼書五月壽皇疾大漸詔嘉

王擴問疾重華宮至是書六月壽皇崩帝稱疾不出留正等請壽聖皇太后代行喪禮嗚呼虎狼之

暴尚不泯乎父子之天君子跡趙惇之逆實虎狼禽獸之不若也然則孝宗之崩豈非逆惇有以致之手繩以大法當與金人逆亮同科諸賢生於其朝亦云不幸甚矣且留正號為賢相以太后代行喪禮無乃不可乎彼太后孝宗之母也烏可以母行子之喪禮耶于時逆惇既托疾不出事誠太變矣正也即當請于太后曰嘉王陛下之親子也既代陛下問疾重華官遂請攝行喪禮不然則是喪無所主豈可聞於敵國哉如此庶可以愧服逆惇之心而陰定嘉王之儲位也況正為異姓之卿耶昔昌邑王奔昭帝之喪居道上不素食霍光猶得以數其罪而廢之況惇親為逆行者哉正而能此則當行子孟之事不能則奉祠丘園不亦可乎今乃不此之策至於秋七月乃欲請建太子不蒙逆惇所允稱疾而逃果何義哉故曰

君子作事謀始正其昧於此乎

尊壽聖皇太后為太皇太后壽成皇后為皇太后○秋  
七月留正請建太子不許遂稱疾而遁

葉適言于留正曰帝疾而不執喪將何辭以謝天下  
今嘉王長若預建參決則疑謗釋矣正從之率宰執  
入奏云皇子嘉王仁孝夙成宜早正儲位以安人心  
不報越六日又請御批云甚好明日宰執同擬旨以  
進乞帝親批付學士院降詔是夕御劄付丞相云歷  
事歲久念欲退閒正得之大懼因朝佯仆于庭即出  
國門上表請老且云願陛下速回淵鑒追悟前非漸  
收人心庶保國祚初正始議帝以疾未克主喪宜立  
皇太子監國若未倦勤當復明辟設議內禪太子可  
即位而趙汝愚請以太皇太后旨禪位嘉王正謂建  
儲詔未下遽及此他日必難處  
與汝愚異遂以肩輿五鼓逃去



發明 有官守者不得其職則去有言責者不得其言則去此固人臣事君之常禮然以當時之事勢觀之太上一初崩光宗稱疾國本未固人心惶惑尚賴一二大臣宏濟艱難傾否為泰之時留正既為首相總攬朝綱又非其他羣牧庶職之比必當糾率百僚共圖奠安宗社之長策可也建儲不允稱疾宵奔豈大臣國危與危之義乎故書稱疾而遁則其托詞避嫌之意可見矣此固責備賢者之意也

太皇太后詔嘉王擴成服即位尊帝為太上皇帝皇后為太上皇后

留正既去人心益搖會帝臨朝忽仆于地趙汝愚憂危不知所出內禪之議益決屬工部尚書趙彥逾結

殿帥郭杲而與左選郎官葉適左司郎中徐誼謀可  
以白內禪意於太皇太后者乃遣知閣門事韓侂胄  
侂胄琦五世孫太后女弟之子也侂胄因所善內侍  
張宗尹以奏太后不獲命明日往又不獲命遂巡將  
退內侍闕禮見而問之侂胄具述汝愚意禮令少俟  
入見太后而泣太后問故禮對曰聖人讀書萬卷亦嘗  
見有如此時而保無亂者乎太后曰此非汝所知禮  
曰此事人人知之今丞相已出所賴者趙知院旦夕  
亦去矣言與淚俱下太后驚曰知院同姓事體與他  
人異乃亦去乎禮曰知院未去非但以同姓故以  
太皇太后為可恃耳今定六計而不獲命勢不得不  
去去將如天下何願聖人三思太后問侂胄安在禮  
曰臣已留其俟命太后曰事順則可令諭好為之禮  
報侂胄且云來早太后于壽皇梓宮前垂簾引執政  
侂胄復命日已向夕汝愚始以其事語陳騏余端禮  
亟命殿帥郭杲等夜以兵分衛南北內闕禮使傅昌

朝密製黃袍是日嘉王謁告不入臨時將禫祭汝愚  
曰禫祭重事王不可不出翌日甲子羣臣入王亦入  
汝愚率百官詣梓宮前太后垂簾汝愚率同列再拜  
奏皇帝疾未能執喪臣等乞立皇子嘉王為太子以  
係人心皇帝批出有甚好二字繼有念欲退閒之旨  
取太皇太后處分太后曰既有御筆相公當奉行汝  
愚曰茲事重大播之天下書之史冊須議一指揮太  
后允諾汝愚袖出所擬太后指揮以進云皇帝以疾  
至今未能執喪曾有御筆欲自退閒皇子嘉王擴可  
即皇帝位尊皇帝為太上皇帝皇后為太上皇后太  
后覽畢曰甚善汝愚奏自今臣等有合奏事當取嗣  
君處分然恐兩宮父子間有難處者須煩太后主張  
又奏上皇疾未平驟聞此事不無驚疑乞今都知楊  
舜卿提舉本宮任其責遂召舜卿至簾前面諭之太  
后乃命汝愚以旨諭皇子即位皇子固辭曰恐負不  
孝名汝愚奏天子當以安社稷定國家為孝今中外

人人憂亂萬一變生置太上皇何地衆扶皇子入素  
幄被黃袍方却立未坐汝愚率同列再拜皇子詣几  
筵奠哭盡哀須臾立仗訖惟百官班皇子哀服出就  
重華殿東廡素幄立內侍扶掖乃坐百官起居訖行  
禫祭禮尋詔即以寢殿為泰安宮以奉  
上皇民心悅懌中外宴然汝愚之力也

**發明**

當時禫位之議非出於光宗之本心乃羣臣  
之權變故綱目特書太皇太后詔嘉王擴成  
服即位若夫高宗孝宗之傳則異乎是故  
書法亦不容於強同也君子宜詳觀焉

**廣義**

嗚呼逆悖父疾不問安父崩不成服惟婦言  
是用動輒稱疾既云有疾何與虐后招搖玉  
津手作偽心勞何益之有跡其所為大逆不道且  
五霸之君尚以誅不孝為盟當時金人若興問罪  
之師則宋人蕞爾之國其能保有乎汝愚貴戚之  
卿也此舉得矣孟子曰反覆之而不聽則易位汝

愚有焉

### 立皇后韓氏

后琦六世孫父曰同卿能曹則其季父也被選入宮能順適兩宮意遂歸嘉王邸至是立為后

### 大赦○以趙汝愚兼權參知政事

汝愚首裁抑僥倖收召四方知名之士中外引領望治

### 復召留正赴都堂視事

正既去及帝即位以為大行攢宮總護使入謝復出城太皇太后命速宣押趙汝愚復以為請帝手札遣使召正還侍御史張叔椿請議正棄國之罰乃徙叔椿為吏部侍郎而正復相

# 詔求直言

發明

人君即位之初而能詔求直言此固為政之先務從善之盛心也然綱目雖書其詔求直言而分注畧不見其言事之臣苟非言不足錄是必虛應故事也不然堂堂中國濟濟多士豈無片言隻字之可紀哉觀於此則當時之政治亦畧可見矣

○以趙汝愚為右丞相汝愚辭遂以為樞密使

留正至汝愚乞免兼參知政事乃拜右丞相汝愚辭曰同姓之鄉不幸處君臣之變敢言功乎乃命為樞密使

以陳騏知樞密院事羅點簽書院事余端禮參知政事

○加殿前都指揮使郭杲武康節度使知閤門事韓侂  
胄汝州防禦使

韓侂胄欲推定策功趙汝愚曰吾宗臣汝外戚也何  
可以言功惟爪牙之臣則當推賞乃加杲節鉞但遷侂  
胄防禦使侂胄大失望然以傳導詔旨浸見親幸時  
時乘間竊弄成福知臨安府徐誼告汝愚曰侂胄異  
時必為國患宜飽其欲而遠之不聽汝愚欲推葉適  
之功適辭曰國危効忠職也適何功之有及聞侂胄  
舐望言于汝愚曰侂胄所望不過節鉞宜與  
之不從適嘆曰禍自此始矣遂力求補外

發明 嘗觀君子之所存者天理小人之所存者人  
欲是以君子之謀事直而易小人之謀事曲  
而深臣於汝愚侂胄之事見之矣是時韓趙皆預  
定策之功趙為宗臣韓為外戚然趙能辭右相之

命而韓欲冀節餞之加此固君子小人立心處事之不同也迨夫趙加防禦韓心失望而為異日切齒之深讐當時徐誼葉適非不切諫趙皆弗從豈其智之不足耶盡吾天理之心而已矣橫逆之來鳥足計哉綱目書此乃所以志其禍之始也吁

### 貶內侍陳源等十人

侍御史章穎論源及楊舜卿林億年離間之罪詔皆貶官斥外

發明

源等離間兩宮其罪已甚按法行辟死有餘辜寧宗於數閣奴惓惓不舍茲因公論僅克

貶官果何謂乎綱目書貶陳源等若無罪然者所以譏宋罰之不以罪也嗚呼微矣

八月召朱熹至以為煥章閣待制兼侍講



先是黃裳為嘉王府翊善上諭之曰嘉王進學皆卿之功裳謝曰若欲進德修業追跡古先哲王則須尋天下第一等人上問為誰裳以熹對彭龜年為嘉王府直講因講魯莊公不能制其母云母不可制當制其侍御僕從王問此誰之說對曰朱熹說也自後每講必問熹說如何至是趙汝愚首薦熹遂自知潭州召入經筵熹在道聞泰安朝禮尚缺近習已有用事者即具奏云陛下嗣位之初方將一新庶政所宜愛惜名器若使倖門一開其弊不可復塞至於博延儒臣專意講學必求所以深得親權者為建極導民之本思所以大振朝綱者為防微慮遠之圖不報且辭新命不許及入對首言乃者太皇太后躬定大策陛下寅紹丕圖可謂處之以權而庶幾不失其正今反不能無疑於逆順之際竊為陛下憂之尤有可諉者亦曰陛下之心前日未嘗有求位之計今日未嘗忘思親之心此則所以行權而不失其正之根本也充

未嘗求位之心以盡負罪引慝之誠充未嘗忘親之心以致溫清定省之理始終不越乎此而大倫可正大本可立矣時趙彥逾按視孝宗山陵以為土肉淺薄下有水石孫逢吉覆按乞別求吉兆有旨集議熹上議狀言壽皇聖德衣冠之藏當博求名山不宜偏信臺史委之水泉沙礫之中不報

**廣義** 寧宗新服厥命而首舉大儒可謂慶矣綱目大書曰召朱熹為煥章閣待制兼侍講文無美辭而美在其中矣

### 增置講讀官

從趙汝愚之請以給事中黃裳中書舍人陳傅良彭龜年為之詔經筵官開陳經旨救正缺失晚講官賜

坐以

講

內批罷左丞相留正

韓侂胄浸謀預政數詣都堂正使省吏諭之曰此非知閣日往來之地侂胄怒而退會正與汝愚議攢宮不合侂胄因間之于帝遂以手詔罷正出知建康府正謹法度惜名器毫髮不可干以私與周必大俱以相業稱

發明

觀易遯之大象曰君子以遠小人而嚴傳曰嚴者君子自守之常而小人自不能近

始之九二曰包有魚無咎不利賓傳曰魚陰物二與初遇為包有魚之象然制之在己故猶可以無咎若不利而使遇於衆則其為害廣矣當時留正忌韓侂胄之詣都堂拒之甚峻可謂有不惡而嚴之意然不能制之在己則其害為甚廣焉由是假托內批進退宰執其端雖微其勢浸盛是蓋留趙

諸賢不能制之於微也雖然一介小人遽竊國柄  
寧宗之心如何哉綱目書此始焉惜之終焉譏之  
也

### 以趙汝愚為右丞相

汝愚本倚留正共事怒韓侂胄不以告及其謁因不  
見之侂胄慙忿羅點謂汝愚曰公誤矣汝愚悟乃見  
之侂胄  
終不懌

### 九月羅點卒

點孝友端介不為矯激之行或謂天下事非才不辦  
點曰當論其心苟不正才雖過人果何取哉時給  
事中黃裳亦卒趙汝愚泣謂帝曰黃裳羅  
點相繼淪謝二臣不幸天下之不幸也

以京鏜簽書樞密院事

初帝欲除鏜帥蜀趙汝愚謂人曰鏜望輕資淺豈可當此方面鏜聞而憾之由是韓侂胄引以自助

冬十月內批以謝深甫為御史中丞劉德秀為監察御史罷右正言黃度

韓侂胄日夜謀去趙汝愚知閣門事劉攽亦以不得預內禪心懷不平因謂侂胄曰趙相欲專大功君豈惟不得節鉞將恐不免崩海之行侂胄愕然問計攽曰惟有用臺諫耳侂胄問若何而可攽曰御筆批出是也侂胄然之遂以內批拜給事中謝深甫為中丞會汝愚請令近臣薦御史侂胄密以其黨劉德秀屬深甫遂以內批用之由是劉三傑李沐等牽連以進言路皆侂胄之人排斥正士朱熹憂其害政每因進

對為帝切言之又約吏部侍郎彭龜年同劾侂胄會龜年出護使客不果熹復疏白汝愚當以厚賞酬侂胄之勞勿使預政汝愚為人疏謂其易制不以為慮黃度將上疏論侂胄之姦侂胄覺之以御筆除度知平江府度言蔡京擅權天下所由以亂今侂胄假御筆逐諫臣使俛首法不得效一言非國之利也固辭奉

祠歸養

發明

一陰之生其勢雖微聖人必謹之者慮其浸盛也一小人之進其名雖卑君子必憂之者

恐其蠹政也是故聖人作易每扶陽而抑陰先王治國恒親賢而遠佞蓋深甫德秀險邪小人侂胄黨類引為臺諫其志可知是乃拔茅茹而以其彙也小人豈不連類而進乎黃度將欲糾劾即被罷去則是正道不行而邪說暴橫矣小人之禍何其烈哉綱目特揭而書之于冊者蓋亦深罪當時垂

戒後世也

廣義

分注載內批由于侂胄于以見寧宗初政皆在侂胄掌握寧宗特擁虛器而已侂胄薦引

羣小而寧宗一切用之由

是降其國于闇昧矣惜哉

### 詔議祧廟

時以孝宗祔廟議宗廟迭毀之制孫逢吉曾三復首請併祧禧宣二祖奉太祖居第一室祫祭則正東向之位有旨集議禧順翼宣四祖祧主宜有所歸自太祖首尊四祖之廟治平間議者以世數寔遠請遷禧祖於夾室後王安石等奏禧祖有廟與稷契無異請復其舊丞相趙汝愚不以復祀禧祖為然侍從多從其說吏部尚書鄭僑欲且祧宣祖而祔孝宗侍講朱熹以為藏之夾室則是以祖宗之主下藏於子孫之

夾室又擬為廟制以為物豈有無本而生者廟堂不以聞而毀撤禧宣廟室更創別廟以奉四祖

發明

昔魯人逆祀春秋譏之然猶未至於祧廟也今寧宗欲議宗廟迭毀之制方且欲祧禧順

翼宣而諛臣如孫逢吉曾三復又從而逢其惡故雖議終不決而綱目亦必直書以貶之也夫寧宗嗣宋鴻基躬為子孫今乃欲祧其四祖則其肆行不道為可知矣況侂冑區區椒房一外戚復何所憚宜其專執朝柄而不顧也噫

閏月內批罷煥章閣待制兼侍講朱熹

熹每進講務積誠意以感動帝心以平日所論著數陳開折坦然明白可舉而行講畢有可以開益帝德罄竭無隱帝亦虛心嘉納焉至是以黃度之去因講畢奏疏極言陛下即位未能旬月而進退宰臣移



易臺諫皆出陛下之獨斷中外咸謂左右或竊其柄  
臣恐主威下移求治反亂矣疏入侂胄大怒使優人  
竄冠閹袖象大儒戲于帝前因乘間言熹迂闊不可  
用帝方倚任侂胄乃出御批云憫卿耆艾恐難立講  
已除卿官觀趙汝愚袖御筆見帝且諫且拜帝不省  
汝愚因求罷政不許越二日侂胄使其黨封內批付  
熹熹即附奏謝遂行中書舍人陳傳良封還錄黃起  
居郎劉光祖起居舍人鄧駟御史吳玘吏部侍郎孫  
逢吉登聞鼓院游仲鴻交章留熹皆不報傳良光祖  
亦坐罷工部侍郎黃艾因侍講問逐熹之驟帝曰始  
除熹經筵耳今乃事事欲與聞艾力辨其故帝不聽  
熹登第五十年仕於外僅九考立朝才四十六日進  
講者七知無不言既去  
侂胄益無所忌憚矣

## 發明

若是乎君子之道難行也朱子在朝積誠諷  
諫罄竭無隱帝亦虛心嘉納庶幾有行道之

基也茲因正人漸逐而乃上疏條陳激怒侂冑擯斥經筵嗚呼君子所學者正道所行者正事其事君以正乃其分耳不意見忤權佞從中沮之使道既不行復為黜罷然則君子之於小人何薰蕕冰炭之相反也自假內批而君子不能措手足矣宋之世何治日嘗少而亂日嘗多哉特書內批而皆不去其官則惜君子而罪小人之意為可見

廣義

丞相留正之罷以內批待制文公之罷以內批羣姦謝深甫等進亦以內批厥後進侂冑

罷龜年亦以內批則知寧宗雖處天位要亦韓氏之廝役耳噫寧宗闇弱而侂冑窮兇極惡如此寧不斬宋之國脉而召玉津之禍乎

十一月以韓侂冑兼樞密都承旨

初詔侂冑可特遷二官侂冑覲覲節鉞意不滿力辭  
乃止遷一官為宜州觀察使怨趙汝愚益深至是特  
遷都  
承旨

### 詔行孝宗皇帝喪三年

先是有司請於易月之外用漆紗淺黃之制朱熹在  
講筵奏言自漢文短喪歷代因之天子遂無三年之  
喪為父且然則嫡孫承重可知人紀廢壞三綱不明  
十有餘年莫能釐正壽皇聖帝至性自天易月之外  
猶執通喪朝衣朝冠皆用大布所宜著在方冊為萬  
世法程陞下以世嫡承大統承重之服著在禮律宜  
遵壽皇已行之法一時倉卒不及詳議遂用漆紗淺  
黃之服使壽皇已行之禮舉而復墜臣竊痛之然既  
往之事不及追改啓殯發引禮當復用初喪之服至  
是詔遵用三年之制中外百官皆以涼衫視事蓋用

熹言也

葬永阜陵○十二月內批罷吏部侍郎兼侍講彭龜年

進韓侂胄一官

侂胄權勢日重龜年上疏條奏其姦請去之且云陛下逐朱熹太暴故欲陛下亦亟去此小人毋使天下人謂陛下去君子易去小人難於是龜年侂胄俱請祠帝欲兩罷其職陳駿進曰以閣門去經筵何以示天下既而內批龜年與郡侂胄進一官與在京宮觀給事中林大中中書舍人樓鑰繳奏以為非是不聽由是侂胄愈橫

發明

魯齋許氏曰人君處億兆之上所操者予奪進退賞罰生殺之權不幸見欺以非為是以

是為非其害可勝慨耶是時侂冑權勢日重龜年上疏條陳既而兩皆請祠當辨是否然則罷侂冑而用龜年於法則宜罷龜年而用侂冑於義則悖夫何於龜年則罷其職於侂冑則進一官公道之心果安在哉由是予奪賞罰之權亂而侂冑愈橫難制矣綱目書此蓋亦不得已之意也吁

陳騏罷以余端禮知樞密院事京鏜參知政事鄭僑同知樞密院事

騏與趙汝愚素不協未嘗同堂語及爭彭龜年事韓侂冑語人曰彭侍郎不貪好官故也元樞亦欲為好人耶故罷之而引京鏜居政府以間汝愚汝愚孤立于朝天子亦無所倚信

以趙彥逾為四川制置使

工部尚書趙彥逾以有功於帝室冀趙汝愚引居政  
府及除蜀帥大怒遂與韓侂胄合因陛辭疏廷臣姓  
名于帝指為汝愚之黨且曰老奴今去  
不惜為陛下言之由是帝亦疑汝愚矣

卯巳

寧宗皇帝慶元元年

金明昌六年

春正月白虹貫日以李

沐為右正言二月罷右丞相趙汝愚

韓侂胄欲逐汝愚而難其名謀於京鏗鏗曰彼宗姓  
也誣以謀危社稷則一網打盡矣侂胄然之以秘書  
監李沐嘗有怨于汝愚引為右正言使奏汝愚以同  
姓居相位將不利于社稷乞罷其政以尊安天位杜  
塞姦源是日汝愚出浙江亭待罪遂以觀文殿大學  
士出知福州謝深甫等論汝愚冒居相位今既罷免  
不當加以書殿隆名帥藩重寄乞令奉祠請咎命提  
舉洞霄宮直學士院鄭湜草制詞有曰頃我家之多

難賴碩輔之精忠持危定傾安社稷以為悅任公竭節利國家無不為坐無貶詞亦免官兵部侍郎章穎侍經幃帝曰諫官有言趙汝愚者卿等謂何同列漫無可否穎奏言天地變遷人情危疑加以敵人媢侮國勢未安未可輕退大臣願降詔宣諭汝愚毋聽其去國子祭酒李祥言去歲國遭大戚中外洶洶留正棄宰相而去官僚幾欲解散軍民皆將為亂兩宮隔絕國喪無主汝愚以樞臣獨不避殞身滅族之禍奉太皇太后命翊陛下以登九五勛勞著于社稷精忠貫于天地乃卒受黜黜而去天下後世其謂何知臨安府徐誼素為汝愚所器凡有政務多咨訪之誼隨事禪助不避形迹又嘗勸汝愚早退及豫防侂冑之姦侂冑尤怨之及是與國子博士楊簡亦抗論留汝愚李沐劾為黨皆斥之

發明

災異必書重天變也白虹者妖氣所凝侂冑之謂也日者人君之表寧宗之謂也以白虹

而貫日以妖氣而侵陽況當即位紀元之始其意豈不明且切歟宋之君臣未見其有憂勤修省之心而侂胄小人反挾私忿以相報復官李沐之奸邪誣汝愚之謀逆寧宗不察是非罷其相位豈不深可哀哉汝愚不能制侂胄而卒為侂胄所制詎非臣不密則失身之驗乎明乎此然後可論綱目之法矣

### 三月朔日食

廣義

二月趙汝愚鄭湜章穎李祥徐誼楊簡諸賢之罷三月即有日食之變況乎正月白虹貫

日所以著侂胄兇惡之兆也上天垂戒近且昭矣寧宗恬不知省未聞其求直言言闕失之事方且滋侂胄之暴斥逐正人靡所不為跡其所以為君又微欽之不若也微欽特以金人方熾而寧宗則



遇金人始哀故其事有不同耳雖  
然蒙古之禍未必不基於寧宗也

○夏四月安置大府寺丞呂祖儉于韶州

祖儉上書訴趙汝愚之忠併論朱熹老儒彭龜年舊  
學李祥老成不當罷斥語侵韓侂胄有旨祖儉朋比  
罔上送韶州安置中書舍人鄧駟繳奏祖儉不當貶  
不從樓鑰因進讀論及之侂胄語人曰復有論救祖  
儉者當處以新州象乃不敢言或謂侂胄曰自趙丞  
相去天下已切齒今又投祖儉瘴鄉不幸或死則怨  
益重侂胄始改送吉州祖儉嘗曰因世變有所摧折  
失其素履者固不足言因世變而意氣有所加者亦  
私心也竟

死吉州

以余端禮為右丞相鄭僑參知政事京鏜知樞密院事

謝深甫簽書院事○流太學生楊宏中等六人

宏中與周端朝張銜林仲麟蔣傳徐範六人伏闕上書言近者諫官李沐論罷趙汝愚中外咨憤而李沐以為父老懼呼蒙蔽天聽一至於此陛下獨不念去歲之事乎人情驚疑變在朝夕是時假非汝愚出死力定大議雖百李沐固知攸濟當國家多難汝愚立樞府本兵柄指揮操縱何向不可不以此時為利今上下安妥乃有異意乎章穎李祥楊簡發於中激力辨其非即遭斥逐六館之士拊膺憤怨李沐自知邪正不兩立思欲盡覆正人以便其私必託朋黨以罔陛下之聽臣恐君子小人消長之機於此一判則靖康已然之驗何堪再見於今日邪伏願陛下念汝愚之忠勤察祥簡之非黨灼李沐之回邪竄沐以謝天下還祥等以收士心疏上詔宏中等因亂上書扇搖國是悉送五百里外編管宏中銜仲麟範皆福州人

端朝温州人傳信州人傳久居太學忠鯁有聞扣關之事皆其屬藁

發明

傳曰好直而惡枉天下之至情然人每失其正者心有所倚而不能自克也汝愚被讒而

貶人神之所共憤然侂冑權傾人主滿朝側目無敢忤逆唯呂祖儉正明汝愚之寃於前楊宏中等暴白汝愚之寃於後激怒權姦遂皆竄逐嗚呼公論不行而邪說暴橫君子不幸而處於昏瞶之時也詳書于策

其義自見

廣義

嗚呼君子不幸而處汙世鮮有不罹其禍者也自暴秦坑儒之後其間亡國之事或誣指

朋黨或禁錮黨人未聞有流太學生之名也惟宋之徽高二宗居此惡聲而不疑焉昔徽宗放太學生鄧肅于田里惑於蔡京也高宗殺太學生陳東惑于黃潛善也鄧肅之放陳東之死雖由於蔡京

潛善然猶稟命于徽高至於宏中等之流寧宗出自已見殆有甚於徽高也嗟夫太學者董子所謂賢士之所關也入君培養之則國以之興戕賊之則國以之亡自古國之興亡皆由乎此況乎士之未遇者其平日涵養薰陶孰不欲正君而善俗修政而立事辨義利之分明邪正之異苟於國事危迫之秋而不正言之則視君父為途人實自負于作養也惡在其學為忠與孝哉彼宏中等非不知禍隨于言誠以情激于中不能自已是以但知在己之納忠而不虞君父之加罪也然則寧宗之流六君子六君子非所憂也而國無仁賢寧宗實可憂矣

六月右正言劉德秀乞考核邪正真偽遂罷國子司業

汪逵等

自程顥程頤傳孔孟千載之學其徒楊時傳之羅從  
彥從彥傳之李侗朱熹師侗致知力行其學大振流  
俗醜正多不便之遂有道學之名陰以攻訐及韓侂  
胄用事士大夫素為清議所擯者乃教以凡相與異  
者皆道學之人也陰疏姓名授之俾以次斥逐或又  
為言以道學目之則有何罪當名曰偽學蓋謂貪黷  
放肆乃人真情廉潔好修者皆偽耳由是有偽學之  
目善類皆不自安至是德秀上言邪正之辨無過於  
真與偽而已彼口道先王之言而行如市人所不為  
在興王之所必斥也昔孝宗垂意規復首務核實凡  
言行相違者未嘗不深知其姦臣願陛下以孝宗為  
法考核真偽以辨邪正詔下其章由是博士孫元卿  
袁燮國子正陳武皆罷汪逵入劄子辨之德秀以逵  
為狂言亦被斥中丞何澹急欲執政亦上疏言專門  
之學流而為偽空虛短拙文詐沽名願風厲學者專  
師孔子不必自相標榜于廟堂詔榜既而吏部郎官

麋師旦復請考核真偽被遷左司員外郎又有張貴模者指論太極圖亦被賞擢澹復上疏言在朝之臣大臣既熟知其邪迹然亦不敢白發以招報復之禍望明詔大臣去其所當去者

### 發明

易曰方以類聚物以羣分吉凶生矣佐胃得志誣陷善良巧立淫名簧惑主聽由是劉德秀之徒希求固寵羽翼成風而遂有邪正真偽之言嗚呼以正為邪以邪為正以真為偽以偽為真君子受禍博矣汪達等上章辨論遂皆罷黜然則正人何讐於國而見絕之深乎此小人之心邪欲既熾未流無窮駸駸乎不至於敗國亡家而不已其禍何烈哉是以人主謹於取舍毋使君子小人雜還於清明之朝焉耳綱目書此其亦垂戒來世云

### 廣義

自古國於天地間者未有無正學扶持之而能獨立者也無正學則天理銷人欲熾人將

相戕相賊如禽獸之相搏相噬者焉欲為君而臣弑之欲為父而子弑之人類之滅蓋有不難者矣故曰君不君臣不臣父不父子不子雖有粟吾得而食諸彼三代之學所以明人倫者其意蓋慮此也今寧宗之朝太學生流之國子官罷之則是居中國去人倫無君子之謂也尚可以名人國哉大易豐之上六有曰豐其屋蔀其家閭其戶閭其無人三歲不覿凶此之謂歟

加韓侂胄保寧節度使○冬十一月竄故相趙汝愚于永州汝愚至衡州暴卒

韓侂胄忌汝愚必欲寘之死以息人言至是用何澹疏落汝愚觀文殿大學士及宮觀監察御史胡紘遂上言汝愚倡引偽徒謀為不軌乘龍授鬻假夢為符因條奏其十不遜且及徐誼詔責汝愚寧遠軍節度

副使永州安置誼惠州團練副使南安軍安置時汪  
義端當制遂用漢誅劉屈氂唐戮李林甫事示欲殺  
之之意迪功郎趙師召亦上書乞斬汝愚帝不從汝  
愚怡然就道謂諸子曰觀侂冑之意必欲殺我我死  
汝曹尚可免也明年正月行至衡州病作衡守錢鏊  
承侂冑密論窘辱百端汝愚暴薨天下聞而寃之計  
間有旨追復元官許歸葬中書舍人吳宗旦繳還復  
官之命汝愚學問有用常以司馬光富弼韓琦范仲  
淹自期凡平昔所聞於師友如張栻朱熹呂祖謙汪  
應辰王十朋胡銓李燾林光朝之言欲次第行之未  
果而罷政初汝愚嘗夢孝宗授以湯鼎背負白龍升  
天後翼嘉王以素服即位蓋其驗也讒者遂以為罪  
云

發明

汝愚賢相而為權奸所妬容死遺方誠神人之  
共憤天理所不容通鑑續編書安置提舉



洞霄宮趙汝愚而不稱其官則是汝愚有罪之可  
貶也何以允愜與情乎至我朝綱目始明其誣枉  
變文特書曰竄故相趙汝愚于永州至衡州暴卒  
所以扶天理過人欲表忠賢之節正姦宄之心其  
旨嚴矣然而曰故相既以明其  
無罪曰暴卒復以哀其非命也

廣義

嗚呼汝愚安置永州可以快侂胄之意矣何  
侂胄肆毒若是之甚耶想夫侂胄之意以為

汝愚人望也其或不死他日必為我之憂此所以  
致其必死乃姦人之用心也彼汝愚之死人皆冤  
之臣獨惜其忠有餘而智不足也當其為右相之  
日已忤侂胄及侂胄勢質薰灼伏內批以斥逐忠  
良無一可免汝愚即當引退避侂胄如蛇蠍角巾  
私第奉祠丘園如韓世忠之避秦檜可也如此則  
忠智兩盡其美可勝言哉詩曰既明  
且哲以保其身汝愚不此之講惜哉

# 金平章政事完顏守貞罷

守貞剛忠明亮通習典故凡論對必傳經義時金有國七十年禮樂刑政多因舊制金主欲更定修正為一代法其儀式條約多守貞才訂故明昌之治號稱清明又好接引善類以列朝廷為胥持國所忌罷去

丙辰

二年

金承安元年

春正月以余端禮京鏜為左右丞相謝

深甫叅知政事鄭僑知樞密院事何澹同知院事

廣義

權莫重于丞相樞密姦莫甚于端禮之徒以至姦之人而握至重之權則宋事日非斷可

識

矣

○二月以端明殿學士葉翥知貢舉

翦與劉德秀同知貢舉奏言偽學之魁以匹夫竊人主之柄鼓動天下故文風未能丕變乞將語錄之類盡行除毀故是科取士稍涉義理者悉皆黜落六經語孟中庸大學之書為世大禁淮西總領張奎上言通者偽學盛行賴陛下聖明斥罷天下皆洗心滌慮不敢復為前日之習願明詔在位之臣上下堅守勿變毋使偽言偽行乘間而入以壞既定之規模乃除奎尚書左司郎官

發明

是時以偽學斥君子而所用者皆蠅營狗苟之徒如以余端禮京鏜為丞相謝深甫之為參政鄭僑之知樞密何澹同知院事葉翦之知貢舉此皆侂胄之爪牙其同惡相濟為如何哉天下不治從可知矣故綱目詳書以著其失也

夏四月余端禮罷

時韓侂胄擅權屏斥正士端  
禮鬱鬱不愜志稱疾求罷

以何澹參知政事葉翥簽書樞密院事罷禮部侍郎倪

思

初翥要思列疏論偽學思不  
從韓侂胄遂薦翥而罷思

秋七月罷殿中侍御史黃黼

中書舍人汪義端引唐李林甫故事以偽學之黨皆  
名士欲盡除之太皇太后聞而非之帝乃詔臺諫給  
舍論奏不必更及舊事務在平正以副朕建中之意  
詔下韓侂胄及其黨皆怒劉德秀遂與御史張伯垓  
姚愈等上疏力爭以為不可乃改不必更及舊事為  
不必專及舊事自是侂胄與其黨攻治之志愈急矣

黃黼上言治道在黜首惡而任其賢使才者不失其職而不才者無所憾故仁宗嘗曰朕不欲留人過失於心此皇極之道也遂罷黼而以姚愈代之

發明

劉更生曰執狐疑之心者來讒賊之口持不斷之意者開羣枉之門讒邪進則象賢退羣

枉成則正士消是時羣陰益朝君子道否俛思以不論偽學見逆佞胄而罷官黃黼以正言和解見忤佞胄而罷黜是知小人之禍烈於湯火蹈之即爛觸之即焦不亦慘乎寧宗故縱姦宄權勢下移是亦委裘之主肅綱目皆以無罪例書其義可見

廣義

分注載黃黼曰治道在黜首惡其意蓋指佞胄也于時前後左右皆佞胄之黨而黃黼則

一薛居州也一薛

居州獨如宋王何

# 八月禁用偽學之黨

太常少卿胡絃上書言比年以來偽學猖獗圖為不  
軌動搖上皇詆誣聖德幾至大亂賴二三大臣臺諫  
出死力而排之故元惡隕命羣邪屏跡自御筆存救  
偏建中之說或者誤認天意急於奉承倡為調停之  
議取前日偽學之姦黨次第用之以冀幸其他日不  
相報復往者建中靖國之事可以為戒陛下何未悟  
也宜令退伏田里循省愆咎遂詔偽學之黨宰執權  
住進擬自是學禁愈急大理寺直邵哀然言三十年  
來偽學顯行場屋之權盡歸其黨乞詔大臣審察其  
所學詔偽學之黨勿除在內差遣已而言者又論偽  
學之禍乞監元祐調停之說杜其根源遂有詔監司  
帥守薦舉改官並於奏牘前聲說非偽學之人會鄉  
試漕司前期取家狀必令書以不是偽學五字撫州  
推官柴中行獨申漕司云自幼習易讀程氏易傳未

委是與不是偽學如以為  
偽不願考校士論壯之

發明

楊氏曰欲激人主之怒莫如黨論欲盡逐天下之君子以求空天下之人才亦莫如黨論

親族黨也交遊黨也薦引黨也欲陷一士止於一士而已矣至舉而治之以黨則親族也交遊也所薦引也可一網而盡矣漢之黨錮唐之牛李與宋之黨人是也嗚呼是知小人之心欲欺人主以誣君子必杜撰淫名謂之偽學則庶幾君無疑心國無異議蓋將盡驅正人以遂己私云爾殊不知尺霧障天不虧於大寸雲點日何損於明也哉綱目特揭而書之者所以惡小人之專權哀君子之不也幸

冬十月召陳賈為兵部侍郎

以其嘗擊

朱熹也

十二月削秘閣修撰朱熹官竄處士蔡元定于道州

熹家居自以蒙累朝知遇之恩且尚帶從臣職名義不容默乃草封事數萬言陳姦邪蔽主之禍因以明丞相趙汝愚之寃子弟諸生更進迭諫以為必且賈禍熹不聽蔡元定請以著決之遇避之同人熹默然取藁焚之遂上奏力辭職名詔仍充秘閣修撰時臺諫皆韓侂胄所引洵洵爭欲以熹為奇貨然無敢先發者胡紘未達時嘗謁熹於建安熹待學子惟脫粟飯遇紘不能異也紘不悅語人曰此非人情隻雞尊酒山中未為乏也及是為監察御史乃銳然以擊熹任責物色無所得經年醞釀章疏乃成會改太常少卿不果有沈繼祖者為小官時嘗採摭熹語孟之語以自售至是以追論程頤得為御史紘以疏草授之



繼祖謂可立致富貴遂誣論熹十罪且言熹剽竊張  
載程頤之餘論以喫菜事魔之妖術簧鼓後進張浮  
駕誕私立品題收召四方無行義之徒以益其黨伍  
潛形匿迹如鬼如魅乞禡熹職罷祠其徒蔡元定佐  
熹為妖乞送別州編管詔熹落職罷祠竄元定于道  
州已而選人余熹上書乞斬熹以絕偽學謝深甫抵  
其書于地語同列曰朱元晦蔡元定不過自相講明  
耳果何罪乎事乃止元定生而穎異父發博覽羣書  
以程氏語錄邵氏經世張氏正蒙授元定曰此孔孟  
正脉也元定深涵其義既長辨析益精登建陽西山  
絕頂忍饑啖薺以讀書聞熹名往師之熹叩其學驚  
曰季道吾老友也凡性與天道之妙他弟子不得聞  
者必以語元定焉尤褒揚萬里交薦于朝召之不起  
會偽學黨禁之論起元定曰吾其不免乎及聞貶不  
辭家即就道熹與從游者百餘人饑別蕭寺中坐客  
興歎有泣下者熹微視元定不異平時因喟然曰友

朋相愛之情季通不挫之志可謂兩得矣衆謂宜緩行元定曰獲罪于天可逃乎杖屨同其子沈行三千里脚為流血無幾微見言回至春陵遠近來學者日衆州士子莫不趨席下以聽講說愛元定者謂宜謝生徒元定曰彼以學來何忍拒之若有禍患亦非閉門塞竇所能避也貽書訓諸子曰獨行勿愧影獨寢不愧衾勿以吾得罪故遂懈其志在道逾年卒元定於書無所不讀於事無所不究義理洞見大原圖書禮樂制度無不精妙著洪範解大衍詳說律呂新書行于世學者尊之曰西山先生熹嘗曰造化微妙惟深於理者能識之吾與季通言而不厭也每諸生請疑必令先質元定而後為之折衷小人尤深嫉之故是時有朱熹倡偽蔡元定實羽翼之之奏

發明

天下有無形之禍借非權臣而借於權臣擾非盜賊而擾於盜賊強非敵國而強於敵國

其惟朋黨之論乎是時嚴禁正學君子道否而狐媚狗彘之徒欲希富貴阿順成風以攻陷君子為奇功以排斥正人為能事沈繼祖摺撫姦言詆誣朱蔡誠王法之所不原也寧宗信而任之抑又何哉綱目以無罪例書之其義蓋可見矣

廣義

文公之罷官李通之寃逐綱目備書于冊適足以遺寧宗萬年之臭流朱蔡百世之芳然則抑之者乃所以揚之也毀之者乃所以譽之也於朱蔡二賢惡何損

丁巳三年

金承安二年

春正月鄭僑罷○夏閏六月貶留正為

光祿卿居之邵州

朝散大夫劉三傑免喪入見論偽學之黨今變而為逆黨防之不可不至及論留正共引偽學之罪侂冑

大喜即日降旨除三傑右  
正言正坐貶邵州居住

秋八月金胥持國有罪免九月復以持國參知政事

持國為金主信任與李妃筦擅朝政張復亨等十人  
皆趨走其門俱為御史臺官時謂之胥門十哲至是  
為言者所論持國致仕十人皆  
外補未幾復召持國參知政事

發明 去惡不遠則惡日長討罪不亟則罪益深持  
國擅竊君權濁亂朝政金主既知其姦而罷

黜之矣復召用之謂之何  
哉直書于策深譏之也

冬十一月太皇太后吳氏崩

諡曰憲

聖慈烈

十二月籍偽學罷吏部侍郎黃由

知綿州王沈上疏乞置偽學之籍仍自今曾受偽學  
舉薦闕陞及刑法廉吏自代之人並令省部籍記姓  
名與間慢差遣從之於是偽學逆黨得罪著籍者趙  
汝愚留正周必大王簡四人為之首朱熹徐誼彭龜  
年陳傅良薛叔似章穎鄭湜樓鑰林大中黃由黃黼  
何異孫逢吉劉光祖呂祖儉葉適楊芳項安世沈有  
開曾三聘游仲鴻吳獵李祥楊簡趙汝謹趙汝談陳  
峴范仲黼汪遠孫元卿素燮陳武田澹黃度張體仁  
蔡幼學黃顥周南吳柔勝李直王厚之孟浩趙鞏白  
炎震皇甫斌危仲任張致遠楊宏中周端朝張銜林  
仲麟蔣傳徐範蔡元定呂祖泰凡五十九人黃由上  
言人主不可待天下以黨與不必置籍以示不廣毀  
中侍御史張巖劾由阿附罷之  
而推沈為利州路轉運判官

發明

上書籍偽學下書罷黃由則由為黨人而連坐之意明矣蓋宋之所謂偽學者皆正心誠

意修齊治平之道治天下而舍此則將何所施乎寧宗之時小人道長君子道消誠天地閉賢人隱之時也君子不幸適丁其時立斯朝食斯祿而以斯道匡君道未得行先為窘辱使天下士大夫皆以正道自諱無敢言者然則小人之禍豈不甚可畏哉綱目比事而書之於策所以深為當時愧也廣義嗚呼學之為道侂冑所謂偽者乃所以為真也以真為偽偽者必多矣可籍哉然謂之籍則必有限而不知舉世皆偽豈特五十九人而已哉當時得與此籍者何其幸也黃由之言可謂辭不迫切而意已獨至者歟罷其官者由實快也

戊午

四年

金承安三年

春正月以葉耆同知樞密院事○三月

葬憲聖慈烈皇后○夏五月加韓侂胄少傅封豫國公

○詔嚴偽學之禁

右諫議大夫姚愈復上言近世行險僥倖之徒倡為道學之名權臣力主其說結為死黨願下明詔播告天下於是命直學士院高文虎草詔曰向者權臣擅朝偽邪朋比協肆姦宄包藏禍心賴天之靈宗廟之福朕獲奉慈訓膺受內禪陰謀壞散國勢復安嘉與士大夫厲精更始凡曰淫朋比德幾其自新而厯載臻茲弗迪厥化締交合盟窺伺間隙毀譽舛午沆言間發以傾國是而惑衆心甚至竊附於元祐之衆賢而不思實類乎紹聖之姦黨朕既深詔二三大臣與夫侍從言議之官益維持正論以明示天下矣論告所抵宜各改視回聽毋復借疑似之說以惑亂世俗若其遂非不悔怙終不悛邦有常刑必罰毋赦詔既

下韓侂胄大喜即遷文虎愈於要職四川都大茶馬  
丁逢入對極論元祐建中調停之害且引蘇轍任伯  
雨之言為證京鏜何澹附侂

胄深悅逢言薦為軍器監

發明

嚴者已甚之詞也國勢以多才而扶抑不知  
正人君子何負於宋而棄絕之深耶自侂胄

得志無歲不以偽學為事寧宗拱手而聽命焉甚  
可惡也孟子曰不仁者可與言哉安其危而利其  
菑樂其所以亡者不仁而可與言則何亡國敗家  
之有嗚呼厥後偽學之禁甫息而窮兵黷武之念  
興天下之民從此疲矣然則小人不特貽禍於君  
子抑且貽禍於君父是以有天下國家之寄者不  
可不鑒

爾吁

廣義

抑觀侂胄以六經為偽學而禁之然其黨之  
草認卒用六經之言如謝深甫韓氏之黨也



乃曰朱元晦蔡元定不過自相講明耳果何罪乎  
觀此則侂冑之黨非惡正而好偽也乃急於趨利  
廉恥道喪故也然其天理一點之明何嘗因其所  
好而泯滅哉此天之未定然也天定則其醜類自  
底滅亡耳何庸較之邪易曰君  
子得與小人剝廬此之謂也

秋七月葉翥罷八月以謝深甫知樞密院事許及之同  
知院事

及之為吏部尚書諂事韓侂冑無所不至居二年不  
遷見侂冑流涕叙其知遇之意哀遲之狀不覺屈膝  
侂冑惻然憐之故有是命侂冑嘗值生辰羣公上壽  
既畢集及之適後至闌入掩闕拒之及之大窘會門  
闌未及閉遂俯僂而入當時有由  
竇尚書屈膝執政之語傳以為笑

育太祖十世孫與愿于宮中賜名囀

帝未有嗣京鐘等請擇宗室子育之詔育燕懿王德昭九世孫與愿于宮中年六歲矣尋以為福州觀察使賜名囀

封衛國公

以趙師霁為工部侍郎

師霁附韓侂胄得知臨安府侂胄生日百官爭貢珍異師霁最後至出小合曰願獻少果核侂胄啟之乃粟金蒲桃小架上綴大珠百餘顆象慙侂胄有愛妾張譚王陳四人皆封郡夫人其次有名位者又十人或獻北珠冠四枚於侂胄侂胄以遺四夫人其十人亦欲之未有以應也師霁聞之亟市北珠製十冠以獻十人者喜為求遷官拜工部侍郎侂胄嘗與衆客飲南園過山莊顧竹籬草舍曰此真田舍間氣象

但欠犬吠鷄鳴耳俄聞犬嗥叢薄視之  
乃師曩也侂胄大笑聞者莫不鄙之

冬十月金造承安寶貨

己未五年

金承安四年

春正月奪前起居舍人彭龜年等官

初趙汝愚定策時樞密院直省官蔡璉從旁竊聽因而漏言汝愚竄之既而逃還臨安韓侂胄聞之乃使璉誣告汝愚定策時有異謀具列賓僚所言凡七十餘紙詔下大理捕鞠彭龜年曾三聘沈有開葉適項安世等以實其事中書舍人范仲藝謂侂胄曰章惇蔡確之權不為不盛然而至今得罪于清議者以興大獄故耳相公胡為蹈之侂胄曰某初無此心以諸公見迫不容但已問其人乃知京鐘劉德秀實主其議侂胄取錄黃藏之事遂格張釜劉三傑張巖程松等論之不已詔累經赦宥宜免然猶奪龜年三品官

而擢璉進

義副尉

## 二月放主管王虛觀劉光祖于房州

光祖撰涪州學記謂學者明聖人之道以修其身而世方以道為偽以學為棄物好惡出於一時是非定於萬世諫議大夫張奎劾光祖佐逆不成蓄憤懷姦欺世固上詔落職房州居住

### 發明

楊氏曰一陽獨存其猶歲寒百草搖落之後尚餘一碩大之果而不為物食吁亦危矣自

偽學之禁正人黜逐間有一二君子猶存如剝之碩果小人尚又吹毛求疵羅織其罪必求君子盡去小人盡留然後已否則有未已也龜年以定策之事而奪其官光祖以撰記其事而落其職皆小人已甚之心也然則侂冑之罪可勝誅哉

廣義觀光祖之言何其光明俊偉  
之至哉輝耀青史不亦宜乎

### 夏五月行統天歷

先是詔造新歷至是成賜名統天蓋自建隆迄慶元  
二百五十年間歷十四變上距黃帝之歷凡五十變  
矣議者謂自渡江以來  
統天新歷无復踈謬

### 秋八月帝始朝太上皇于壽康宮

帝幸羣臣詣壽康宮上壽初見太上皇成禮  
而還明曰羣臣以過宮上壽禮成奉表稱賀

發明

始者初肇之詞以見帝未嘗朝至此而初見  
之也蓋形端則表正源潔則流清天子所為

下觀而化也光宗既不朝其父寧宗亦不朝其父  
所謂上行下效捷於影響是以家齊而國治也豈

非天理之反報乎雖然父雖不慈子不可以不孝  
光祖制於始后而不朝其父此固無足言者寧宗  
既知其過安可效尤各欲自盡而已矣寧宗即位  
五年于茲朝父之禮僅克一見則其久曠定省豈  
不從可知哉特書

始朝深罪之也

廣義書曰始者以見前此未嘗朝也嗚呼寧宗之  
於光宗亦猶光宗之於孝宗也身教如此何

足恠哉

九月加韓侂胄少師封平原郡王○是歲諸州大水

發明

加不宜加也侂胄欺君蠹政無足言者而綱  
目前書加侂胄少師封豫國公此書加侂胄

少師封平原郡王噫一姦邪小人加爵之屢宜乎  
有以召天變也大水者陰逆而與怨氣并之所致

帝行逆德而致陰沴宜矣諸州大水為天下記異也上書加侂冑爵下書諸州大水則侂冑召異莫明於此夫侂冑黷貫既盈為天所絕宋不之罪可勝惜哉綱目不言事應而事應具存觀於此類為可見

矣

六年

金永安五年

春閏二月以京鏜謝深甫為左右丞相何

澹知樞密院事○三月故秘閣修撰朱熹卒

熹家貧故諸生自遠至者豆飯藜羹率與之共往往稱貸於人以給用非其道義一介不取也時攻偽學日急士之繩趨尺步稍以儒自名者無所容其身從游之士特立不顧者屏伏丘壑倚阿巽懦者更名他師過門不入甚至變易衣冠狎游市肆以自別其非黨而熹日與諸生講學不休或勸其謝遣生徒者笑

而不答疾且革正坐整衣冠就枕而卒年七十一將  
葬右正言施康年言四方僞徒聚于信上欲送僞師  
之葬會聚之間非妄談時人短長則謬議時政得失  
望令守臣約束從之熹所著有易本義啟蒙著卦考  
誤詩集傳大學中庸章句或問論語孟子集註太極  
圖通書西銘解楚辭集註辨正韓文考異所編次有  
論孟集義孟子指要中庸輯畧孝經刊誤小學書通  
鑑綱目宋名臣言行錄家禮近思錄河南程氏遺書  
伊洛淵源錄儀禮經傳通解其門人不可勝計最知  
名者黃榦李燾張洽陳淳李方子黃灝蔡沉輔廣榦  
之言曰道之正統待人而後傳自周以來任傳道之  
責不過數人而能使斯道章章較著者一二人而止  
耳由孔子而後曾子子思得其微至孟子而始著由  
孟子而後周程張子繼其統至熹而始著衆以為知  
言榦初見熹夜不設榻不解帶語入曰直鄉志堅思  
苦與之處甚有益因妻以女及熹病革以深衣及所著



書授榦與之訣曰吾道之託在此吾無憾矣熹歿榦  
弟子日盛編禮著書講論經理朝夕不倦卒贈朝奉  
郎燔初見熹熹告以曾子宏毅之語燔因以宏名其  
齋凡諸生未達者熹先令訪燔俟有所發乃從而折  
衷之諸生畏服燔嘗曰凡人不必待仕宦有位為職  
事方為功業但隨力到處有以及物即功業矣居家  
講道學者宗之卒贈直華文閣洽從熹學自六經傳  
注而下皆究其指歸熹嘉其篤志謂黃榦曰所望以  
永斯道之傳者二三君也洽自少用力於敬平居不  
異常人至義所當為則勇不可奪著春秋集註地理  
沿革表行于世任終直寶章閣淳少習舉子業林宗  
臣見而奇之謂曰此非聖賢事業也因授以近思錄  
淳讀之遂盡棄其業而學焉及熹至淳淳請受教為  
學益力熹語人曰吾南來喜得陳淳由是所聞皆切  
要語及熹沒淳追思之病自我抑無書不讀無物不  
格日積月累義理貫通恬退自守多所著述仕終安

溪主簿方子端敬純篤初見熹熹謂曰觀公為人自是寡過但寬太中要規矩和緩中要果決方子遂以果名其齋嘗曰吾於問學雖未能盡然幸於大本有見處此心常覺泰然不為物欲所漬耳灑性行端飾以孝友稱廣淳謹勤恪嘗著四書纂疏詩傳童子問以發明師旨沉元定子也著書傳

發明

凡卒故官錄賢也子朱子發聖人未發之精蘊集諸儒未集之大成正心修身安貧樂道

樂則行之憂則違之誠當代之大賢也然卒忌讒邪弗果大用非朱子之不幸乃宋室之不幸也萬世而下仰其餘澤以先知覺後知以先覺覺後覺顧不偉哉是以朱子之屈於一時正所以伸於後世豈若凡卉之流春榮而秋瘁耶嗚呼若朱子者可謂身雖沒而名不與之俱沒矣

廣義

抑考寧宗之初嘗召文公為煥章閣待制兼侍講韓侂胄欲攻偽學以內批罷之今綱目

於其卒也何不以是官書而書曰故秘閣修撰蓋  
孝宗朝嘗以文公為崇政殿說書文公辭不至因  
以秘閣修撰奉祠然則綱目不書煥章閣待  
制兼侍講而書曰故秘閣修撰者承其志也

夏六月朔日食○太上皇后李氏崩

諡曰

慈懿

許及之罷○秋七月以陳自强簽書樞密院事

自强嘗為韓侂胄童子師及侂胄當國自强入都待  
銓欲見之無以自通僦居主人出入侂胄家為入言  
之一日侂胄召自强比至則從官畢集侂胄設褥于  
堂延自强升坐再拜次召從官同坐從官踞踏莫敢  
居上者侂胄徐曰陳先生老儒泪沒可念坐客唯唯  
明日交章薦其才即除太學錄未踰歲三遷為秘書

即既入館即改右正言月餘拜諫  
議大夫御史中丞旬日遂秉政

### 八月太上皇崩

年五十有四史臣曰光宗幼有令聞嚮用儒雅即位  
之初總權綱屏嬖倖薄賦寬刑有可觀者及夫宮幃  
妬悍閹寺交搆驚憂至疾  
孝養日怠孝宗之業哀矣

### 京鐘卒

鐘初為刑部尚書帝甚尊禮時韓侂胄權勢震天下  
鐘既得位一變其素守於國事漫無可否但奉行侂  
胄風旨而已又薦劉德秀排擊善類偽學之名鐘實  
發之史臣曰士君子立身行事一失其正流而不知  
返遂為千古之  
罪人可不懼哉

攢慈懿皇后于修吉寺○九月處士呂祖泰上書請誅  
韓侂胄詔配祖泰于欽州牢城

祖泰祖儉從弟也性疏達尚氣誼論世事無忌諱先  
是祖謙以言事貶祖泰語其友曰自吾兄之貶諸人  
箝口我雖無位義必以言報國當少須之今亦未敢  
以累吾兄也至是祖儉卒祖泰乃擊登聞鼓上書論  
韓侂胄有無君之心請誅之以防禍亂其畧曰道學  
自古所持以為國者也丞相汝愚之黨是將空陛下之國而陛  
下不知悟邪陳自強侂胄童稚之師躡致宰輔陛下  
舊學之臣彭龜年等今安在邪蘇師旦平江之吏胥  
周筠韓氏之廝役人人知之今師旦以潛邸隨龍筠  
以皇后親屬俱得大官不知陛下在潛邸時果識師  
旦乎椒房之親果有筠乎侂胄徒自尊大而卑陵朝

廷一至於此願亟誅侂胄師旦筠而逐罷自強之徒  
故大臣在者獨周必大可用宜以代之不然事將不  
測書出中外大駭有旨呂祖泰挾私上書語言狂妄  
拘管連州右諫議大夫程松與祖泰狎友懼曰人知  
我素與遊其謂我與聞乎乃獨奏言祖泰有當誅之  
罪且其上書必有教之者今縱不殺猶當杖黥竄之  
遠方殿中侍御史陳謙亦以為言乃杖祖泰一百配  
欽州牢城收管祖泰自期必死冀以身悟朝廷了無  
懼色既至府尹為好語諉之曰誰教汝共為章試言  
之吾且置汝祖泰笑曰公何問之愚也吾固知必死  
而可受教於人且與人議之乎尹曰汝病風喪心邪  
祖泰曰以吾觀之若今之附韓氏得美官者乃病風  
喪心耳祖泰既得罪監察御史林采言偽習之成造  
端自周必大宜加絀削施康年亦言必大首倡偽徒  
私植黨與遂貶  
必大為少保

發明

楊氏曰陰極則生陽亂極則思治白公之亂楚幾危矣而國人望子高之來卒安楚者子

高也此君子得輿而民所載之效也羣小剝正道以覆邦家如剝床焉自足及幹自幹及膚猶不已必剝其室廬此大厦將顛之時也有國者亦可以少悟矣祖泰憤侂冑之竊權遂直諫而獲罪謂之何哉是故舉處士所以罪在朝之臣也書請誅則所以予祖泰而罪侂冑也書詔配祖泰所以譏不從善也嗚呼祖泰憂國忠矣侂

冑罪惡

彰矣寧宗之位虛矣

廣義

抑觀自侂冑竊弄威權以來其間但見阿附以得好官者日新月盛未聞有一攻其罪者

馬所以然者正人端士擯斥殆盡舉朝皆韓氏之廝役奴隸也夫何恠哉祖泰無官守言責者也特激于中心不平故以死攻之耳今讀其章猶可以想見其浩然之氣矣噫千古英豪舍祖泰其誰歟

冬十月加韓侂胄太傅○十一月皇后韓氏崩

諡曰

恭淑

十二月葬永崇陵○攢恭淑皇后于廣教寺

辛酉

嘉泰元年

金泰和元年

春二月臨安大火

四日乃滅焚燒民居五萬二千餘家自渡江以來都城火災未有如是歲者帝下詔罪已避殿減膳出內府錢十六萬米六萬餘斛分賜被火之家

發明

人火曰火大火者甚詞也是時侂胄身都將相妨賢病國臨安之火安知非侂胄為之不

然天變何從而生乎此綱目書法之深意紀災異之道也嗚呼微矣



秋七月何澹罷

時吳挺子曦為殿前副都指揮使自以世守西蜀為國藩屏而身留行都不得如志乃以賄賂宰輔規圖帥蜀未及賂澹韓侂胄已許之澹持不可侂胄怒曰始以君肯相就黜偽學汲引至此今顧立異邪遂罷奉祠澹急於榮進阿附侂胄斥逐善類賢士為之一空士論罪之

以陳自強參知政事張釜簽書樞密院事○以吳曦為興州都統制

曦至興州因僭副都統制王大節罷之由是兵權悉歸于曦異志遂成矣

大旱

發明

大旱者恒暘也亂政之後又直凶年言民以訕上怨咨之氣感動天變而旱乾作矣其以

大旱書者或不禱或雖禱而不雨也不禱則無憂國恤民之心禱而不雨格天之精意闕矣然是時

姦臣當國帝擁虛位天變之生不亦宜哉綱目書大旱而不載其勤卹之政於下則宋之君臣其以

災為玩以民為

輕之意可見矣

廣義

前書二月臨安大火至七月書大旱一歲中大火大旱所以著侂冑酷烈之徵也

○八月張釜罷○以張巖參知政事程松同知樞密院事

皆附韓侂冑者松諂侂冑尤甚自知錢塘縣不二年為諫議大夫滿歲未遷殊怏怏乃市一妾獻之名曰

松壽侂胄曰柰何與大諫同名答曰欲使賤名  
常達筠聽耳侂胄憐之遂除同知樞密院事

### 柰曼襲西遼滅之

西遼王珠勒呼出獵柰曼王庫楚類伏兵八千擒之  
而據其位尊珠勒呼為太上皇朝夕問起居珠勒呼  
尋死遼

祀始絕

### 癸明

輕行而掩之曰襲按胡傳曰滅國之與見滅  
罪孰為重奪人土地使不得有其民人毀人

宗廟使不得奉其祭祀非至不仁者莫之忍為見  
滅而書滅亡國之善詞上下之同力也其亦不幸  
焉爾語曰興滅國繼絕世天下之民歸心焉今乃  
滅人之國而絕其世罪莫重矣乃柰曼西遼其舉  
號賊之耳凡書滅者  
不再貶而其惡自見

壬戌二年

金泰和二年

春正月以蘇師旦兼樞密都承旨

初韓侂胄為平江府兵馬鈐轄時師旦以筆吏事之侂胄愛其辨慧帝登極竄姓名于藩邸吏士內遂以隨龍恩得官至

是權勢日盛

二月弛偽學黨禁復諸貶謫者官

偽學之禍雖本於韓侂胄欲去異己以快所私然實京登創謀而何澹劉德秀胡紘成之及登死三人亦罷侂胄厭前事之乖戾欲稍更改以消中外之議會張孝伯謂侂胄曰不弛黨禁恐後不免報復之禍籍田令陳景思侂胄之姻也亦謂侂胄勿為已甚侂胄然之於是趙汝愚追復資政殿學士黨人見在者徐誼劉光祖陳傅良章穎薛叔似葉適曾三聘項安世范仲黼黃灝詹體仁游仲鴻諸人咸先後復官自便

又謂薦贖中不係偽學一節俾勿復有言時朱熹沒已踰年周必大留正各已貶秩致仕詔熹以寺制致仕必大復少傳

留正復少保

發明

書之何嘉悔悟也易曰拔茅茹貞吉志在君也小人而變為君子則能以愛君為念而不

計其私矣自禁正學人神共憤今侂冑翻然悔悟改絃易轍弛偽學黨禁復貶謫者官豈非小人而變為君子者乎大抵聖人不貴於無過而貴於改過過而不改是謂過矣此綱目與人為善之意也

## 禁私史

有商人私持起居郎熊克中興小歷及九朝通畧等書欲渡淮盱眙軍以聞遂命諸道察郡邑書坊所鬻書凡事干國體者悉令毀棄言者因諸取禮部員外郎李燾續通鑑長編知龍州王侁東都事畧監都鹽

倉李丙丁未錄及通畧語錄家傳等書下史官考訂或有裨于公議即乞存留不許刊行從之

廣義

私史之禁秦檜行之於前侂冑踵之於後兇人造姦如出一手然既謂之史則非私矣何

也史者公天下後世之是非者也惡有曰公曰私之異邪嗚呼侂冑雖能禁于一時其能禁于天下後世乎書禁私史譏之也

夏五月朔日食○秋八月以袁說友同知樞密院事○冬十一月以陳自強知樞密院事許及之參知政事○十二月立貴妃楊氏為皇后

后少以姿容選入宮帝即位封婕妤好韓后崩中宮未有所屬時后為貴妃與曹美人俱有寵韓侂冑以后

頗涉書史知古今性警敏任權術而曹美人柔順勸  
帝立曹氏帝不從竟立后由是后與佞曹有怨矣

## 加韓侂胄太師

先是監惠民局夏元中上書請依文彥博故事以侂  
胄平章軍國重事侂胄繆為辭謝乞致仕詔不許而  
罷元中至是進位太師因以勢利蠱士大夫之心薛  
叔以辛棄疾陳謙等皆起廢顯用當時困於久斥者  
往往損晚節以規榮進政府樞密臺諫侍從皆出侂  
胄之門而蘇師旦周筠又侂胄廝役亦得預聞國政  
羣小滿朝  
勢焰熏灼

## 是歲大蝗

癸明 蟲之傷稼曰蝗不曰蝗而曰大蝗志其甚耳  
其曰大蝗災重及民也而詳志之如此者急

民事謹天災仁人之心王者之務也遇天災而不懼忽民事而不修而又為繁政重賦以感之國之危無日矣宋之君臣尚可與論微彼桑土網繆牖戶之意哉

癸亥 三年

金泰和三年

春正月謝深甫罷

初深甫力求罷政帝曰卿能為朕守法度惜名器不可言去至是固請乃許之

張巖罷○帝視太學

發明

書帝視太學而分注畧不載其講讀推恩之實則當時以為文具可知矣臨學謁聖帝王

之美事寧宗忽之可勝惜哉

此綱目予而未盡之意也

以表說友參知政事傅伯壽簽書樞密院事伯壽辭



不拜二月以費士寅簽書樞密院事○夏四月朔日食

○五月以陳自強為右丞相

時侂胄專權凡所欲為宰執惕息不敢為異自強至印空名劄劄授之惟所欲為宰執不預知也言路扼塞每月按舉小吏一二人謂之月課又有泛論君德時事皆取其陳熟緩慢畧無撻拂者言之或問之則愧謝曰聊以塞責爾加以苞苴盛行自強尤貪鄙四方致書餽必題其緘云某物若干并獻凡書題無并字則不開縱子弟親戚闖通貨賄任進于請必諧價而後予都城大火自強所貯一夕燬燼侂胄首遺之萬緡執政列郡聞之皆有恥不數月得六十萬緡遂倍所失之數嘗語人曰自強惟一死以報師王每稱侂胄為恩主恩父蘇師旦為叔堂吏史達祖為兄侂胄姦究專國自強表裏之功為多

廣義

管子曰禮義廉恥國之四維四維不張國乃滅亡斯言也實人君致禮之本此董仲舒引

之以為武帝告也今侂胄敢行暴亂凡所引用者不次陞擢致位通顯充物朝廷同惡相濟曾何有於禮義廉恥者哉舉皆無禮無義無廉無恥之徒也南宋至此可謂通天地而閉塞之時也孟子謂伯夷得聖之清臣於此益有感焉

以許及之知樞密院事○秋七月造戰艦八月增置襄陽騎軍

尋又置激

浦水軍

九月袁說友罷冬十月以費士寅參知政事張孝伯同

知樞密院事

甲子四年

金泰和四年

春正月韓侂胄定議伐金

金為北鄙準布等部所擾無歲不興師討伐兵連禍結士卒塗炭府倉空匱國勢日弱羣盜蜂起賦歛日繁民不堪命有勸韓侂胄立蓋世功名以自固者侂胄然之恢復之議遂起聚財募卒出封樁庫黃金萬兩以待賞功命吳曦練兵西蜀既而安豐守臣厲仲方言淮北流民咸願歸附而浙東安撫使辛棄疾入見言金國必亂亡願屬元老大臣備兵為倉卒應變之計侂胄大喜鄭挺鄧友龍等又附和其說侂胄用師之意益銳矣

發明

按春秋隱四年書翬帥師會伐鄭左氏謂宋公乞師公弗許用父固請而行君子謂翬已

有無君之心故春秋削去公子以示貶至隱十年又書翬帥師會伐宋先儒謂羽父先期而往不待君命故春秋不氏以貶之以戒兵柄下移之失未幾果有鍾巫之變此聖人垂訓於經所以戒後世制治未亂辨之於早者也今馬宋之侂冑定議伐金以一時利害計之未為失策然斷自一心不待朝命之及已非征伐自天子出之意其與翬之固請不待君命殆又甚之況其師出無功則喪兵失地蓋自此始綱目不書認議伐金而直書韓侂冑定議伐金則其專輒無君已見於此何待他時而後見耶此宋之權綱不舉所以終於不能克復者正坐此爾夫征伐天子之大權而使人臣執之得以專行於外其進其退率循已私而朝議若無與焉者是以成則為桓溫劉裕敗則為褚裒殷浩綱目皆正色書之初未嘗有予之之意然則軍國大柄固不可一日不謹有天下國家者尚鑒之哉

三月臨安大火詔百官陳時政闕失

發明

臨安之火至是兩見則其人為感召之意明矣上書侂胄定議伐金此書臨安大火則是

天意之與人心每相隨而不相遠不可得而誣者侂胄欺君誤國時政闕失莫大於此何必詔百官以陳之乎修德應天則可以變災而為祥不能修德則所以變祥而為異書詔百官陳時政闕失而分注不載其言事之臣然則當時之求言亦文具焉爾吁

廣義

去年書大火大旱今年又書大火詔百官陳時政闕失蓋時政闕失莫有過於韓侂胄之

暴橫也火旱迭書于冊豈非著侂胄之酷烈也哉

夏四月許及之罷

時兵端開韓侂胄欲令及之  
守金陵及之辭不行遂罷

以張孝伯參知政事錢象祖同知樞密院事○五月追  
封岳飛為鄂王

先已賜諡武穆至是韓侂胄欲風厲諸將乃追  
封飛尋封劉光世為鄜王贈宇文虛中少保

發明

時將用兵追封飛爵本非得正曷為書蓋飛  
以忠貞事主為宋名將雖云非正然亦公論

之不可泯者豈以小人之故而遂沒其善哉夫  
如是然後見綱目書法之意人心天理之機耳

秋八月張孝伯罷○冬十月以張巖參知政事○十二  
月詔宰相兼國用使

韓侂胄議恢復陳自強請遵孝宗典故荆國用司總  
覈內外財賦遂以自強兼國用使費士寅張巖同知  
國用事括克民  
財州郡騷動

乙丑 開禧元年

金泰和五年

春三月費士寅罷

韓侂胄欲以士寅鎮興元為  
宣威之漸士寅固辭遂罷

# 太白晝見

## 發明

太白者兵之象而晝見焉其異甚矣楊誠齋  
曰君子非徒警也有功用焉夫聞變而恐懼

者警也警而已矣過則舍之徒警也君子則不然  
恐懼以先之修省以繼之修省者恐懼之功用也  
修其身省其過則恐無恐懼無懼矣宋之君臣畧  
未見其恐懼修省之實而侂胄小人將荼毒於境

內一念既動災變隨形然則天人相與之際甚可畏也孰謂天道無知其可怠而忽之也哉

○夏四月以錢象祖參知政事劉德秀簽書樞密院事  
○以皇甫斌知襄陽府

尋以斌為京西  
七路招撫副使

竄武學生華岳于建寧

岳上書諫朝廷未宜用岳啟邊釁且乞斬韓侂胄蘇師旦周筠以謝天下侂胄大怒下岳大理編管建寧

蔡明

高宗命傳說曰惟暨乃僚固不同心以匡乃辟俾率先王迪我高后以康兆民說復于

王曰惟木從繩則正后從諫則聖后克聖臣不命其承疇敢不祇若王之休命古之君臣更相戒勉



如此未聞惡直言而罪之也華岳既諫用岳乞誅元惡乃忠於國家者編管建寧謂之何哉厥後喪師失地民罹塗炭然則曲突徙薪之悔不能及矣直書曰竄深譏之也

## 五月金以布薩揆為河南宣撫使

金主璟聞朝廷將用兵召諸大臣問之皆曰宋敗衄之餘自救不暇恐不敢叛盟完顏匡獨曰彼置忠義保捷軍取先世開寶天禧紀元豈忘中國者哉璟然之乃命平章布薩揆宣撫會兵于汴以備之

## 秋七月詔韓侂胄平章軍國事

從陳自強鄧友龍等請也命侂胄三日一朝赴都堂治事論者謂侂胄繫銜比呂夷簡省同字則其體尤尊比文彥博省重字則其所與者廣於是三省印並納其第侂胄置機速房於私第甚者假作御筆升黜

將帥事關機要未

嘗奏稟人莫敢言

以蘇師旦為安遠節度使領閣門事

韓侂胄昵師旦為

腹心故有是除

八月金罷河南宣撫司

布薩揆至汴移文來責敗盟三省樞密院答言邊臣  
生事已行貶黜所置兵亦已抽去揆信之會殿前副  
都指揮使郭倪濠州守將田俊邁誘虹縣民蘇貴等  
為間言於揆曰宋之增戍本虞他盜及聞行臺之建  
蓋畏讐不敢去備且兵皆白丁自稟糧糶窮感饑疾  
死者甚多揆蓋弛備以其言白於金主璟時金羣臣  
皆勸先舉璟曰南北和好四十餘年民不知  
兵不可及聞揆言遂命罷宣撫司及新置兵

以郭倪知揚州

尋兼山東京

東招撫使

九月劉德秀罷○遣使如金

韓侂胄欲審敵虛實故遣陳景俊往賀正旦景俊還  
金主璟論之曰大定初世宗許宋世為姪國朕遵守  
至今豈意爾國屢犯我邊以此遣大臣宣撫河南及  
得爾國公移朕即罷司而爾國侵擾益甚朕惟和好  
歲久委曲涵容恐姪宋皇帝或未詳知卿歸國當具  
言之景俊還以告陳自強自強戒勿言由是用兵益  
決

以丘寔為江淮宣撫使寔辭不拜

初韓侂胄以北伐之議示寔寔曰中原淪陷且百年在我固不可一日而忘然兵凶戰危若首倡非常之舉兵交勝負未可知則首事之禍其誰任之必有誇誕貪進之人攘臂以僥倖萬一宜亟斥絕不然必誤國矣侂胄不納至是命寔宣撫江淮寔手書切諫曰金人未必有意敗盟中國當示大體宜申警軍實使吾常有勝勢若譽自彼作我有詞矣因力辭不拜侂胄不悅

廣義

侂胄欲恢復者私也非公也立寔之論不亦當乎

### 冬十二月金遣使來

金使太常卿趙之傑來賀正旦入見韓侂胄故使贊者犯金主父嫌名以挑之之傑遂倨慢侂胄請帝遂內著作郎朱質乞斬敵使不報

發明 直書曰來不予其朝也綱目之於金人因其  
來聘則嘉而進之因其俗慢則抑而外之所

以嚴正統  
之義也

丙寅 二年 金泰和  
六年

春二月壽慈宮火

太皇太后

移居大內

發明

左氏曰人火曰火天火曰災壽慈宮者太后  
之宮也天子欲尊崇其母故其宮曰壽慈壽

慈火何以書以宮殿之重書之也侂冑擅權啟蒙  
而天子不禁宋室不復能中興矣人火之天所以  
見戒乎宋之君臣恕不  
知懼豈不深可哀哉

以程松為四川宣撫使吳曦副之

松移司興元東軍三萬屬馬曦進屯河池西軍六萬屬馬仍聽節制財賦按劾計司曦由是益得自專松無所闕與松始至欲以執政禮見曦責庭參曦聞之及境而還松用東西軍一千八百自衛曦抽摛以去松亦不悟尋詔曦兼陝西河東招撫使

### 錢象祖罷

韓侂胄銳意用兵象祖執不可遂以懷姦避事罷之尋奪二官信州居住

夏四月以薛叔似為京湖宣撫使鄧友龍為兩淮宣撫使○追奪秦檜王爵改謚繆醜

論檜主和誤國之罪也

廣義

或曰秦檜主和議侂冑主恢復非秦檜而是侂冑可乎曰不可也曰何以知其不可也曰

觀其所行則侂冑似可是而秦檜似可非也究其  
心則侂冑之主恢復即秦檜之主和議也一則懷  
覬覦之心一則圖蓋世之功豈皆為宗廟社稷計  
哉皆私也非公也自古立心弗公未有能濟其事  
者也易曰立心勿  
恒凶此之謂歟

### 金復命布薩揆會兵河南

金聞皇甫斌分兵規取唐鄧復命揆領行省于汴河  
南皆聽節制盡徵諸道籍兵分守要害命彰德守臣  
護韓琦墳凡宋宗族  
所居有司提控之

### 吳曦反獻階成和鳳四州于金以求封

曦既得志與其從弟晁及徐景望趙富米修之董鎮共為反謀陰遣其客姚淮源獻闕外階成和鳳四川于金求

封蜀王

發明

反者悖逆之詞吳氏父子世為蜀帥累沐厚恩非一日矣值朝廷與金起釁正臣子奮不

顧身夫何射一時之利忘父祖之勲假土地以資強鄰皆君親而臣敵國擁兵謀逆叛主求封其罪則不再貶而罪已可見

廣義

侂冑之主恢復也用陳自強之招寇而州郡騷動用丘宓宣撫江淮而丘宓不拜以吳曦

為宣撫副使而吳曦謀反厥事之不濟也明矣

郭倪遣兵復泗州五月下詔伐金



韓侂胄聞已得泗州及新息襄信潁上虹縣乃議降詔畧曰天道好還中國有必伸之理人心效順匹夫無不報之仇維彼敵國猶託要盟朕生靈之資奉溪壑之欲此非出於得已彼乃謂之當然軍入塞而公肆創殘使來庭而敢為桀鰲泊行李之繼遣復媢詞之見加含垢納污在人情而已極聲罪致討屬敵運之將傾兵出有名師直為壯言乎遠言乎近孰無忠義之心為人子為人臣當念祖宗之憤直學士院李璧之詞也初兵部侍郎葉適輪對嘗言其弱而幸安者哀改弱而就强者興侂胄聞而喜之以為直學士院欲籍其草詔以動中外而適以疾辭職乃改命璧云呂中曰小人擅朝欲為專寵固位之計往往至於川兵侂胄在朝窮奸極惡海內切齒而復不度事勢妄啟兵端三邊瘡痍生靈魚肉雖擢髮不足數其罪矣

發明

嗚呼用兵之道不以常勝而處驕不以累敗而頓挫故曰一勝一敗兵家之常郭倪輕浮

小人素不習武今而遣兵復泗州乃一朝之幸非

其能也侂胄以為恢復可必下詔伐金下書攻宥

大敗敗績唐州皆功未能成禍已先及何益之有

雖然中國有必伸之理匹夫無不報之讐宋金世

讐固宜報伐但其輕慮淺謀為可惡耳故綱目前

書定議伐金此書下詔伐金而無罪詞者所以示

中國復讐之義為臣子狗國之勸也故雖侂

胄之跋扈亦畧恕之綱目貴復讐之意深矣

廣義

嗚呼觀其詔則是而于其時則非也譬則表

之於夏葛之於冬尚可以為用乎高宗之時

人心協和將士騰湧使有是詔則知張韓劉岳之

輩鼓勇爭先不啻虎而翼者也金人何足平哉惜

乎冬之無裘夏之無葛矣今也言其國則國無其

人言其邊則邊無其將天道乖戾人心睽離雖有

此詔則夏裘而冬葛矣將焉用之特發於侂冑一已之私耳噫嚴尤匈奴之策陳于王莽陳子昂明堂之議獻于武后侂冑佻金之詔草于寧宗謂之適其時可乎臣故曰觀其詔則是而于其時則非也

## 郭倪遣兵攻宿州大敗

郭倪遣郭倬李汝翼會兵攻宿州敗還至蘄金人追而圍之倬執馬軍司統制田俊邁以與金人乃得免時建康都統李爽攻壽州亦敗

## 皇甫斌敗績于唐州

時江州都統王大節攻蔡州亦不克而潰

發明

兩兵相接曰戰言敗不言戰是不待戰而自敗之謂也言敗績見全軍皆潰也皇甫湜率

衆伐金敗績唐州而綱目不書戰言安危強弱其勢不相敵也是皆君子之筆削非宋史之舊文矣蓋知已知彼可以百戰百勝苟不度德量力輕舉妄動必致喪師辱國而後已寧宗委致侂冑恣其所為侂冑輕啟邊釁而要求大利是侂冑輕用民力以貽禍于國家也書敗績于唐州者言自敗也其自反亦至矣與春秋書王師敗績于茅戎同意

詔以宗室均為沂王柄嗣賜名貴和

初孝宗孫趙惠獻王愷之子均之父曰希聖太祖九世孫也

六月鄧友龍免以丘室為兩淮宣撫使

韓侂胄以師出無功免友龍而以寔代之駐揚州寔至鎮部署諸將悉以三衙江上軍分守江淮要地於是王大節李汝翼皇甫斌李奕等皆坐貶斬郭倬于鎮江

### 秋七月蘇師旦有罪安置韶州

韓侂胄既喪師始覺為蘇師旦所誤一日召李璧飲酒酣語及師旦始謀事璧微摘其過以覘之因極言師旦怙勢招權使明公負謗非竄謫此人不足以謝天下侂胄然之翌日罷師旦官籍其家旬日除名韶州安置

廣義 侂胄之暴橫師旦之作俑也綱目於師旦書有罪者正名正罪也

以張巖知樞密院事李璧參知政事○夏李安全廢其

# 主純佑而自立

安全崇宗孫越王仁友子也廢純佑自立  
改元應天未幾純佑死安全號之曰桓宗

發明

曰廢主自立罪悖逆也安全以臣而廢君以  
強而篡國其罪亦云甚矣亂臣賊子法所必

討今而在中國不能行弔伐之師在四鄰不能修  
連帥之職而乃縱賊不討恣其所為則當時之三  
綱亦可謂掃地矣  
尚可與論人道哉

# 冬十月金布薩揆分兵南侵

布薩揆分兵為九道南下揆兵三萬出潁壽完顏匡  
兵二萬五千出唐鄧赫舍哩子仁兵三萬出渴口赫  
舍哩呼沙呼兵二萬出清河口完顏充兵一萬出陳  
倉富察貞兵一萬出成紀完顏綱兵一萬出臨潭舒

穆魯仲兵五千出鹽川  
完顏隣兵五千出來遠

## 金人圍楚州

呼沙呼自清河口

渡淮遂圍楚州

## 十一月以丘密簽書樞密院事督視江淮軍馬

金人攻淮南日急詔郭杲將兵駐真州以援之又以  
密督視江淮軍馬或勸密棄廬和州為守江計密曰  
棄淮則與敵共長江之險吾當  
與淮南俱存亡乃益增兵防守

## 金人陷京西州軍招撫使趙淳焚城而遁

金完顏匡陷光化棗陽江陵副都統魏友諒突圍奔  
襄陽趙淳焚樊城金人遂破信陽襄陽隨州進圍德

安府

發明

遁者匹夫苟免之事罪怯也趙浮身為安撫親擁強兵不能招徠豪傑撫定黎民相與鑿

池築城效死勿去而乃一聞敵至周敢交鋒逆焚樊城接踵宵遁然則忠安在乎侂冑輕啟釁端得不償失遂使三邊瘡痍生靈魚肉兵連禍結身且不保然蓋世功名者伊誰立哉觀綱目之所書見宋金之強弱矣吁

金布薩揆陷安豐軍遂圍和州

揆引兵至淮遣人密測淮水惟八疊灘可涉即遣鄂屯驥揚兵下蔡聲言欲渡守將何汝勵姚公佐以為誠然悉衆屯花陂以備之揆乃遣布薩等潛師渡八疊駐于南岸官軍不虞其至遂皆潰走自相蹂踐死



者不可勝計揆遂奪潁口下安豐軍及霍江縣進圍和州屯於瓦梁河以控真揚諸州之衝乃整軍列騎張旗幟於沿江上下於是江表大震

金人入西和州十二月入成州吳曦焚河池退壁青野

原

曦既遣姚淮源如金因持重按兵河池韓侂胄日夜望其進兵使者相繼曦恐謀泄乃遣兵攻秦隴與金人力戰以堅侂胄之心金人許封之約曰若按兵閉境不為異同使其師東下無西顧之憂則全蜀之地卿所素有當加封冊一依康王故事更能順流東下助為犄角則苑廡所指盡以相付因命完顏綱經畧之綱進兵水洛訪得曦族人吳端署為水洛城巡檢使遣人報曦曦得報意動以程松在興元未敢發詐

稱枝殺端而陰遣使送款于綱及金富察真破和尚  
原犯西和州曦將王喜等方力戰曦忽傳令退保黑  
谷軍遂潰真入成州曦因焚河池  
退壁清野原自是金人無復顧慮

金人陷真州寇六合郭倪遣兵救之敗績倪棄揚州走

金赫舍哩子仁陷滁州遂入真州州之士民奔逃渡  
江者十餘萬知鎮江府宇文紹節至具舟以濟又廩  
食之自是淮西

縣鎮皆沒于金

發明

夫者匹夫輕身之事賤之也金人入侵二月  
于茲如圍楚州陷京西臨安豐入西和入成

州臨真州攻畧自如周敢與敵然則宋人守備之  
具應變之策亦踈畧矣內既不修而欲為外攘之  
計其克濟乎雖然郭倪之徒前克泗州而以恢復  
自任今臨難不能為國一死却乃苟免逃奔其罪

可勝誅哉故特  
書走以著其罪

# 金人八大散關吳曦還興州

時興州都統制毋思以重兵守關曦聞金兵至因撤  
募關之戍金人由板關谷遠出關後思孤軍不能支  
遂陷曦退屯且口完顏綱遣張仔會之曦言願附金  
之情仔請曦告身為報曦盡出以付仔綱乃以金主  
璟命遣馬良顯持詔書金印立曦為蜀王曦密受之  
遂還興州是夜天赤如血无燭地如晝翌日曦召幟  
屬論意謂東南失守車駕幸四明今宜從權濟事王  
翼楊駿之抗言曰如此則相公忠孝八十年門戶一  
朝掃地矣曦曰吾意已決即遣任辛奉表獻蜀地圖  
及吳氏譜牒于金呂中曰恢復大計也當以人才為  
先今則總戎二邊者誰歟吳曦特膏梁之子弟郭倪  
郭倬李爽李汝翼皇甫斌又皆嵬瑣之庸才平居暇

日不過剋剝士卒苞苴饋賂圖為進身之梯媒甚者外依仇敵以俟中國之動靜朝廷顧以推轂制閫之事悉委之師纔出境而前者敗後者潰大者殲小者奔而統蜀漢之逆曦又以叛聞用兵以來敵之損未一二而吾國之喪敗已不可勝計矣

### 丘室遣使如金軍議和金布薩揆還軍下蔡

金布薩揆欲通和罷兵購得韓琦五世孫元靚遣之渡淮丘室獲之詰所以來之故元靚言兩國交兵北朝皆謂韓太師意今相州宗族墳墓皆不可保故來依太師耳室使畢其說始露講解之意室密使人護送北歸俾扣其實既而元靚回得金行省文字室以聞于朝韓侂胄方以師出屢敗悔其前謀輸家財二十萬以助軍而諭室募人持書幣赴敵營議和室乃遣劉祐持書於揆願講好息兵揆曰稱臣割地獻首

禍之臣乃可密復遣王文往言用兵乃蘇師旦鄧友龍皇甫斌等所為非朝廷意今三人皆已貶黜揆曰佞胄若無意用兵師旦等豈敢尊擅文還宥復遣使相繼以往因許還其淮北流移人及今年歲幣揆始許之自和州退屯下蔡獨

濠州尚使一統軍守之

發明

或以丘宥議和為非是曰天下之勢有強有弱天下之事有經有權雖以宋金世讐不可

忘戰然揆諸國勢度諸事宜宋以積弱之國而抗積威之敵構隙以來喪師失地金人不亡一鐵宋人所損甚多據京西臨淮南入西蜀宋人所恃者惟長江耳豈不戾乎其殆哉用是而觀則丘宥之議和乃權而得中者也金既許和還軍下蔡則其息兵自新之意可見矣大書特書文予之也

廣義

昔者汴京之圍何其難解今和州之圍何其解之易耶曰勢不同也當夫韓里雅布圍汴

也如拘狐兔於場汴宋垂亡之勢十無一二此其圍之所以難解也至若和之受圍也金非昔强宋非昔弱布薩揆素無南侵之意韓侂胄自識用兵之非議和之說各中膏肓此其圍之所以易解也雖然寧宗之憂不在于金而所憂者國之無人耳

### 薛叔似免

叔似以功業自期及臨事絕無可稱屬郡多陷故坐免以吳獵為京湖宣撫使

### 以畢再遇權山東京東招撫司

時諸將用兵皆敗唯再遇數有功金人常以水櫃取勝再遇夜縛藁人數千衣以甲冑持旗幟戈矛嚴立成行味爽鳴鼓金人驚視並放水櫃後知其非兵也甚沮乃出兵攻之金人大敗又嘗引金人與戰且前

且却至于數四視日已晚乃以香料煮豆布地上復  
前搏戰佯為敗走金人乘勝追逐馬饑聞豆香皆就  
食鞭之不前反攻之金人馬死者不可勝計又嘗與  
金人對壘度金兵至者日衆難與爭鋒一夕拔營去  
留旗幟於營并縛生羊置其前二足於鼓上擊鼓有  
聲金人不覺為空營復相持數日及覺欲追之則已  
遠矣

### 程松自興元逃歸

金完顏綽哈攻鳳州松求救于吳曦曦結言當發三  
千騎往松信不疑及曦受金詔宣言金使者欲得陪  
兵至鳳州以和持書諷松使去松不知所為會報  
金兵至百姓奔走相蹂躪松亟趨米倉山而遁自閬  
州順流至重慶以書抵曦旬臘禮稱曦為蜀王曦以  
匣封致餽松望見大恐疑為劍丞逃奔使者追與之

乃金寶也松受而兼程出陝西  
向掩淚曰吾今始獲保頭顱矣

癸明

逃者匹夫之事松為宣撫職任專城遇敵入  
境不能死守反效匹夫之行遁逃苟免不亦

賤乎特書曰逃所以著其幸免而不知命之罪也  
有臣如此尚可以寔其誅戮乎觀今始得保頭顱  
之言豈事君能致其身比哉  
此宋之所以終於不競焉爾

蒙古却特特穆津稱帝號乎鄂諾河

特穆津之先有曰勃端察爾母阿倫果幹生二子而  
寡居夜寢屢有光明照其腹又生三子勃端察爾其  
季也其後子孫蕃衍各自為部居于烏桓之北與鄂  
羅奈曼九姓回鶻故城和林接壤世奉貢于遼金而  
總隸于鞑靼至伊蘇克依并諸部勢愈盛大攻塔塔  
爾部獲其部長特穆津還次于特哩袞盤陀山而生



子因以特穆津名之伊蘇克依死特穆津幼其部衆多歸于族人秦楚特部秦楚特合七部人凡三萬攻之特穆津與其母諤楞率部人為十三翼大戰秦楚特等敗因得少安時秦楚特部地廣民衆而無紀律其下謀曰特穆津衣人以已衣乘人以已馬真吾主也因悉歸之秦楚特部遂微未幾塔塔爾部叛金特穆津自鄂諾河帥衆會金師同滅之以功援特穆津為察罕圖魯猶中國之招討使也特穆津以柰曼部強盛事之甚謹柰曼反侵掠之特穆津乃大會屬部于特默格川議伐柰曼迪延汗營于杭愛山台默爾奇斯諸部兵勢頗盛特穆津與之大戰擒殺迪延汗諸部悉潰特穆津益以盛強明年遂攻西夏破拉吉哩寨經羅索城大掠而還至是大會諸部長于鄂諾河之源建九旂白旗遂自號為成吉斯汗先是金主遣衛王允濟往靖州受特穆津之貢允濟奇其狀免歸言于金主請以事除之金主不許特穆津聞而憾

卷十七  
癸明

舉號斥名所以賤之也稱者不宜稱也是故不宜王而稱王則書稱王不宜帝而稱帝則

書稱帝貴華賤夷春秋之大義也自三代既衰夷狄恣行莫之能禦由漢以來其強且大者如冒頓之控弦四十萬騎頡利之陵跨中原吐蕃之陷沒河隴盛則盛矣至於稱號不過從其本族未有與中國並稱而無別者有宋之時中國衰弱女真強大於是始稱帝號佔據土宇綱目不得已以僭國例處之至於特穆津崛起沙漠僭號稱尊綱目必舉號而斥名嚴正統之分也於此雖書其稱帝自是以後止舉其號此綱目惡其恃疆犯順也若使此時亦例以僭國主稱之則不足以示予奪矣豈君子筆削之大權哉嗚呼微矣

廣義

大抵中國與外邦以人言固有中外之辨以天言則栽培傾覆一理而已故孔子發夷狄

有君之論觀分注備載特穆津興國之由夫豈偶然哉其生也則光明照其母腹其長也則謙謹事夫柰曼俟其侵掠無狀然後會師伐之可謂得人心矣迨夫衛王允濟勸金主除之金主不許可謂得天心矣嗚呼其生也既異而又得天人之助雖欲不興得乎

## 蒙古滅柰曼

發明 凡書滅者不再貶而其惡已見柰曼自嘉泰元年書滅西遼不五年而為蒙古所滅然則天理好還特假手以償滅遼之惡耳後世無故滅人家國者可不鑒哉此亦春秋惡惡短之意也

丁卯三年

金泰和七年

春正月罷立室以張巖督視江淮軍馬

時金已有和意室上疏乞移書金帥以成前議且言金人既指韓侂胄為元謀若移書宜覈免繫銜侂胄

大怒

罷密

以陳自強兼樞密使○吳曦自稱蜀王權大安軍楊震

仲死之

曦遣將利吉引金兵入鳳州以四郡付之表鐵山為  
界曦即興州為行宮改元置百官遣董鎮至成都治  
宮殿欲徙居之議行金之制度號令稱臣于金分其  
所統兵十萬為統帥遣祿祁等戍萬州泛舟下嘉陵  
江聲言約金人夾攻襄陽下黃榜於成都潼川利州  
夔州四路以興州為興德府召隨軍轉運使安丙為  
丞相長史權行都省事丙度不得脫徒死無益乃陽  
與而陰圖之曦又召權大安軍楊震仲震仲不屈飲  
藥而死其他如陳咸自髡其髮史次秦  
自瞽其目李道傳鄧性甫等悉棄官去

發明

直書自稱罪其僭也吳曦稱臣于金稱王于蜀是則一污青史萬古妻涼大節一虧功名

不足贖矣況叛逆之臣王法之所不原者乎震仲不辱偽命仰藥而死其忠全矣苟非明於君臣之義逆順之理者曷克以臻此哉故綱目以全節予之予在震仲則罪在吳曦矣綱目輕重之權衡予奪之大法此類可見

廣義

楊震仲等不臣於曦而死者其龔勝任永馮信之徒歟

二月以楊輔為四川制置使吳曦逐之

輔知成都嘗言吳曦必反帝意輔能誅曦乃密詔授輔制置使許以便宜從事詔至人勸以倡義輔自以不習兵事且內郡無兵可用遷延不發曦移輔知遂寧府輔遂以印授通判韓植棄成都而去

以知建康府葉適兼江淮制置使

適上言三國孫氏嘗以江北守江自南唐以來始失之乞兼節制江北諸州詔從之時用檄旁午而適治事如平時軍須皆從官給民以不擾其防守皆盡法度

金平章政事布薩揆卒于下蔡

揆有疾金主命左丞相完顏宗浩行省事于汴至是揆卒揆為政多惠人樂為用

四川轉運使安丙誅吳曦傳首臨安

監興州合江倉楊巨源謀討曦乃陰與曦將張林朱邦寧及忠義士朱福等深相結眉州人程夢錫知之以告轉運使安丙丙時稱疾未視事乃屬夢錫以書致巨源延之卧所巨源曰先生而為逆賊丞相長史

邪丙號哭曰日前兵將我所知不能奮起必得豪傑  
乃滅此賊巨源曰非先生不足以主此事非巨源不  
足以了此事會興州中軍正將李好義亦結軍士李  
貴進士楊君玉李坤辰李彪等數十人謀誅曦好義  
曰此事誓死報國救四屬生靈但曦死後若無威望  
者鎮撫恐一變未息一變復生欲奉安丙主事使坤  
辰來邀巨源與會巨源往與約還報丙大喜始出  
視事君王與白子申共草密詔畧曰惟干戈省厥躬  
既昧聖賢之戒雖犬馬識其主乃耳仇敵之臣邦有  
常刑罪在不赦二月乙亥未明好義帥其徒七十四  
人入偽宮時偽宮門洞開好義大呼而入曰奉朝廷  
密詔以安長史為宣撫令我誅反賊敢抗者夷其族  
曦衛兵千餘聞有詔皆棄挺而走巨源持詔乘馬自  
稱奉使入內戶曦啓戶欲逸李貴即前執之刃中曦  
頰曦反撲貴仆于地好義急呼王換斧其腰曦始縱  
貴貴遂斫其首馳告丙宣詔軍民拜舞聲動天地持

曦首撫定城中市不易肆盡收曦黨殺之衆推丙權  
四川宣撫使巨源權參贊軍事丙陳曦所以反及矯  
制平賊便宜賞功狀上疏自劾待罪函曦首及違制  
法物與曦所受金人詔印送朝廷曦僭立凡四十一  
日金遣木虎高琪奉冊于曦未至而曦已誅矣先是  
韓侂胄聞曦反大懼與曦書許以茅土之封且召知  
鎮江府宇文紹節問計紹節云安丙非附逆者必能  
討賊侂胄乃密以帛書諭丙云若能圖曦報國以明  
本心即當不次推賞書皆未達而誅曦露布已聞朝  
廷大喜曦首至臨安獻於廟社梟之市三日詔誅曦  
妻子家屬徙嶺南奪曦父挺官爵  
遷曦祖璘子孫出蜀存璘廟祀

發明

誅者討逆之詞吳曦僭竊四蜀寒心引頸以  
望王師久矣安丙之與楊巨源倡鳴大義聲

罪致討卒收成功其誅亂討逆之績偉焉罪人斯  
得市不易肆宣播詔旨羣黎鼓舞可見以逆加順



人心不從其從之者不過苟免刑罰而已非本心也然則安丙討賊之功大矣綱目予奪之旨嚴矣

廣義 抑觀曩之伯父玠以豪俠立功于高宗時雖張韓劉岳不足多讓至其子孫不肖反蒙首惡之誅可哀也已若夫安丙者不顧矯制之嫌以成平賊之績可謂識時達權者歟

### 以方信孺為國信所參議官如金軍

韓侂胄募可以報使金帥府者近臣薦信孺可使自蕭山丞召赴都命以使事信孺曰開釁自我金人設問首謀當以何詞荅之侂胄然遂以信孺為奉使金國通謝國信所參議官持張巖書以行

三月安丙使興州將李好義等復西和階成鳳州及大

散關

楊巨源李好義謂安丙曰曦死賊破膽矣關外四州為蜀要害盍乘勢復取之不然必為後患丙從之於是分遣好義復西和州張林李簡復成州劉昌國復和州張翼復鳳州孫忠銳復大散關好義進兵次于獨頭嶺會忠義及民兵夾擊金人死者蔽路七日至西和人人樂死前無留敵金將完顏欽遁去好義整衆而入軍民歡呼迎拜好義籍府庫以歸于官欲乘勝徑取秦隴以牽制淮寇宣撫司不許士氣皆沮

廣義

分注載李好義欲乘勝徑取秦隴以牽制淮寇于時安丙宣撫而不許其計失矣

以楊輔為四川宣撫使安丙副之夏四月召輔知建康府

吳曦既誅安丙趣楊輔還成都詔以輔為宣撫使丙副之兼知興州許奕為宣諭使改興州為沔州朝廷

察丙與輔異召輔赴闕輔抵建康引咎不進著作  
佐郎楊簡言輔嘗棄成都當召遂命輔知建康

### 程松以罪竄澧州

發明

程松黨惡無謀擅離信地原情定罪死有餘辜今而不究可否僅竄澧州則宋之法網疎

闊亦可見矣直書于冊所

以譏其縱賊不討之失耳

○以錢象祖參知政事○金人復陷大散關○五月太

皇太后謝氏崩

諡成

肅

李好義襲秦州與金將珠格高琪戰敗績

好義還為吳曦將王喜所毒而卒朝廷慮喜為變授節度使移荆鄂都統制呂中曰曦之誅實楊巨源李好義之謀好義失於周防竟為王喜所圖宋知喜為曦黨既不能罪又以節鎮賞之幾何不為唐末之姑息以成藩鎮之駭乎

## 六月安丙殺宣撫司參議官楊巨源

初吳曦誅獎諭詔至興州巨源謂人曰詔命一字不及巨源疑有以蔽其功者俄報王喜授節度使而巨源與通判心益不平乃懇功于朝或謂安丙曰巨源謀亂丙令喜鞠其黨皆抵罪時巨源方與金人戰于鳳州之長橋而敗丙密使興元都統制彭輅收巨源械送閬州獄至大安龍尾灘丙使將校樊世顯殺之忠義之士聞者莫不扼腕流涕

發明

殺殺無罪也吳曦之誅巨源之力為多論功行賞固其宜也夫何詔命一字不及巨源則

人心寧無不平之歎乎安丙不思蔽賢之失反怒巨源羅織抵罪又從而殺之其惡甚矣幾何而不為媚疾忌賢之人哉嗚呼當國家衰弱之餘生靈凋瘵正渴於用人之日而乃恣逞私憤戕殺忠良可哀也已綱目直書安丙殺宣撫司參謀官楊巨源所以著丙專權自恣之罪也巨源無罪故書殺而不去

其官

廣義

安丙平賊之功巨源之力也合以重報而進階柰何惟與通判而已宜其心之不平也又

況信讒而使叛臣之黨誣其罪而殺之果何義哉綱目所以削安丙之官而街巨源者罪有所歸而

寬有所

伸也

# 秋七月大旱蝗

蝗飛蔽天食浙西豆粟

皆盡詔郡邑賑恤之

## 發明

陰陽和而雷雨作今而恒暘不雨乃陰陽不和之故耳君為陽而臣為陰是時寧宗恭己

於上侂胄擅權於天下有道禮樂征伐自天子出侂胄一切專之陰陽不和莫此為甚人為感召天變隨形噫當兵亂倥偬之日民不聊生而又大旱蟲蝗相繼而作悲夫胡氏曰軍旅之後必有凶年言民以徃役怨咨之氣感動天變而旱乾作矣所謂災者害及民物此之謂也綱目特書于策者見天道之與人心有感必應捷如影響然則有天下國家之責者不可不知所恐懼耶

九月貶方信孺官遣右司郎中王柟如金軍

信孺至濠州赫舍哩子仁止之于獄露刃環守之絕其薪水要以五事信孺曰反俘歸幣可也縛送首謀自古無之稱藩割地則非臣子所敢言子仁怒曰若不望生還邪信孺曰吾將命出國門時已置生死度外矣子仁遣至汴見完顏宗浩出就傳舍宗浩使將命者來堅持五說信孺辨對不少屈宗浩不能詰授以報書曰和與戰俟再至決之信孺還朝廷以林拱辰為通謝使與信孺持國書誓草及許通謝百萬緡信孺至汴宗浩怒信孺不曲折建曰遽以誓書來有誅戮禁錮之語信孺不為動將命者曰此非犒軍可了別出事目以示之信孺曰歲幣不可再增故代以通謝錢今得此求彼吾有隕首而已會興州遣師復大散關宗浩益疑之乃遣信孺還書于張巖曰若能稱臣即以江淮之間取中為界欲世為子國即盡割大江為界且斬元謀姦臣函首以獻及添歲幣五萬兩疋犒師銀一十萬兩方可議和好信孺遂致其

書韓侂胄問之信孺言敵所欲者五事一割兩淮二增歲幣三索歸正人四犒軍銀五不敢言侂胄固問之信孺徐曰欲得太師頭耳侂胄大怒奪信孺三官臨江軍居住信孺三使金師以口舌折列敵敵人計屈情見雖未即和然已有成說及賊欲再遣使顧在廷無可者近臣以王柙薦乃命假右司郎中持書北行柙倫之孫也

廣義

信孺義不屈金雖古名使何以加綱目書貶方信孺官者所以著侂胄之私憾與奪秦檜

爵同但信孺秦檜人

品則高下懸絕矣

葬成肅皇后○以趙淳為江淮制置使張巖免

韓侂胄怒金人欲罪首謀和議遂輟復銳意用兵乃以淳鎮江淮而免張巖巖開督府九月費耗縣官錢



三百七十萬  
縉而無成功

冬十一月禮部侍郎史彌遠誅韓侂胄于玉津園詔暴  
侂胄罪惡于中外

自兵興以來蜀口漢淮之民死於兵戈者不可勝計  
公私之力大屈而侂胄意猶未已中外憂懼禮部侍  
郎兼資善堂翊善史彌遠入對因力陳危迫之勢請  
誅侂胄以安邦皇后楊氏素怨侂胄因使皇子榮王  
躡其疏言侂胄再啟兵端將不利於社稷帝不答后  
從旁力贊之帝猶未許后請命其兄楊次山擇羣臣  
可任者與共圖之帝始允可次山遂語彌遠彌遠得密  
旨以錢象祖嘗諫用兵忤侂胄乃先白象祖象祖許之象祖  
以告李壁彌遠自懷中出御筆批云韓侂胄久任國  
柄輕啟兵端使南北生靈枉罹凶害可罷平章軍國

事陳自強阿附充位可罷右丞相目下出國門仍命  
主管殿前司公事夏震以兵三百防護象祖欲奏審  
壁謂事留恐泄乃已翌日侂胄入朝至太廟前震呵  
止之從者皆散震以兵擁侂胄至玉津園側殛殺之  
彌遠象祖以誅侂胄聞帝不信越三日猶以為未死  
後審其果然遂下詔暴侂胄罪惡于中外蓋其謀始  
于彌遠而成于皇后及楊次山帝初無意也論功進  
彌遠為禮部尚書加震福州觀察使侂胄專政十四  
年宰執侍從臺諫藩閫皆其門庶之人天子孤立于  
上威行宮省權震宇內嘗鑿山為沼下瞰太廟出入  
宮闈無度孝宗疇昔思政之所偃然居之老宮人見  
之往往垂涕顏棧草制以為得聖之清易袞撰答詔  
以元聖褒之四方投獻者謂伊霍且奠不足以擬其  
勲余嘉請加九錫趙師霽乞置平原郡王府官屬侂  
胄皆當之不解其嬖妾皆封郡國夫人每內宴與妃  
嬪雜坐恃勢驕倨掖庭皆惡之及籍其家多乘輿服

御之飾其  
借奈極矣

發明

誅者討有罪之詞侂冑罪逆滔天擢髮難數亂臣賊子人人得而誅之者也况彌遠既受

密旨名正言順誅之為宜然前史皆以殺侂冑為詞而分注亦以極殺為文綱目原情定罪變文書誅然後入神之憤洩討賊之義正矣或論賈似道之與韓侂冑惡醜罪齊侂冑為史彌遠所殺似道為鄭虎臣所殺然曷為此書誅而彼書殺耶狗名責實故耳彌遠揚于王庭以正其罪親承密旨從而殛殺故綱目以討賊之義子之虎臣挾其私憤弗克明証承命監押安可擅誅故綱目不以討賊之義子之夫豈厚於彌遠而薄於虎臣乎要在正其是非權其輕重此綱目所以為史中之經也學者能究此義始可與言綱目矣

廣義

分注云侂冑之死其謀始于彌遠而成于皇  
后楊次山而寧宗若不與者然綱目何以書

誅蓋侂冑罪惡彌天神人共怒所謂人人得而誅  
之者也豈特彌遠哉故於彌遠則書其官而於侂  
冑則書誅者正天討也然其罪惡不暴之於未  
死之前而暴於既死之後者豈非畏其兇焰歟

治韓侂冑黨竄陳自強于永州斬蘇師旦流郭俛等于

嶺南貶李璧等官

韓侂冑既死錢象祖探懷中堂帖授自強曰有旨丞  
相罷政自強師上馬顧曰望大參保全明日奪其三  
官永州居住尋竄雷州遣使即韶州誅師旦安置郭  
俛于梅州鄧友龍于循州郭僕于連州貶李璧張巖  
許及之葉適薛叔似  
皇甫斌等官秩有差

蔡明

首惡甫誅黨類宜治苟為不然則一侂胄既沒衆侂胄尚在幾何而不為侂胄之行乎故

詳書予之然曷為不書有罪蓋既曰侂胄黨則其罪可見何必書之以罪哉此綱目書法之深意耳

廣義

此剝之窮也

以衛涇簽書樞密院事○立榮王曦為皇太子更名憐

爭更

名詢

十二月罷山東京東西路招撫司○以錢象祖為右丞

相兼樞密使衛涇雷孝友參知政事史彌遠同知樞密

院事林大中簽書院事


初韓侂胄欲內交於大中大中不許而上書極論其  
姦因辭官屏居時事不掛於口侂胄當國或勸其通  
書以免禍大中日福不可求而得禍  
可懼而免邪不聽凡十二年而復起

廣義

此復之  
通也



御批續資治通鑑綱目卷十七



總校官候補中允 臣王燕緒

校對官編修 臣劉汝暮

謄錄監生 臣王天恩